


EDENI YA SAATANI

 Atu kotame. Oyandwa Leza, twa Ku lumba loko sunu masiku nkambo ka ciindi eci cipati, kuboola alimwi mu Zina lya Mwami Jesu, ku swaanganya sinkondo wesu, sinkondo Wako, abusena aawa mu bbuwa lya nkondo; ku Ijwi, ku mutanda kuzwa ku bantu Bako; kuti bakonzye kubona, sunu masiku, Mwami, Mumuni wa Makani mabotu. Nda lomba kuti Uyo nanika meso eesu amafuta aakumeso, kuti inga ajuka ku Bwini; kuti inga twazwa awa, ka twaamba mu myoyo yesu, “Sena myoyo yesu tiyali kupya muli ndiswe ciindi Nali ku kanana kuli ndiswe mu mugwagwa?” Koponya baciswa a bapengede. Koyumya batyompedwe. Konyamuna maanza aakompeme ayo akalengelela ansi limwi. Akube kuti tulange ku Kuboola kwa Mwami Jesu, oko nko tusyoma kuti kuli aafwaafwi. Twa lomba eci mu Zina lya Jesu. Amenii.

Amu kkale.

² Ndi yosola kwaamba ciindi cisyoono sunu masiku, nkaambo Ndi zyi banji bazwa ku zibeela zinji zya cisi, ku . . . ku kuswangana; na koono kwasunu, no bamwi, elyo mweelede kujoka, nkambo ndiza ni nyendo zya kujokela. Alimwi Nda mulumba. Cifumo ecino Nda likuyanda kumvwa Mukwesu Neville, lwangu. Alimwi Nda kamumvwa ziindi zinji, alimwi ciindi coonse Nda mumvwa ndila mulumba. Pele cifumo cino, oyo mulumbe wa ciindi ceelede, Ndi lizyi Nda jisi kusololelwa kwa Mwami ku swilila kuli eco cifumo cino. Ncibotu maningi! Elyo Nda bona no bantu nywebo nco mubotelwa kuboola a kuswiilila kuli nguwe, awalo. Nkabela unomucitila kabotu lyoonse, Ndi masimpe, ku swiilila kuli nguwe.

³ Nda li kusola kusika ku miswaangano yangu imwi yakubuziyanya sunu; cifumo cino a masikati aya sunu. Ndi cijisi manji, manji, manji akuunka. Elyo Nda . . .

⁴ Mbuli, mbo Ndi syoma, wakali Jetro wakaambila Musa ciindi cimwi, wakaamba, “Kwa vulisya loko kuli nduwe.” Aboobo, tu lijisi bakwesu banji kuno balanganya mapenzi aanu. Alimwi umwi aumwi wabo uleelede mbuli mulao, nkabela kuli zintu zibotu eezyo zyelede kulangasigwa. Elyo inga Nda sala mweembezi wesu, na Mukwesu Mann, a bamwi bakutausi ba Lusyomo wesu kuno. Inga mwainka kuli mbabo. Bayo mwaambila mbubonya buyo cintu cakucita; bantu bamwi, bana babo; kaba sangana kukwatana, na zintu ezyo zilubide. Nkabela bantu aaba inga bamugwasya mbu mbonya mbuli—mbuli muntu uuli oonse uumbi, nkaambo mbalanda ba Kristo. Elyo a muunke kuli mbabo, elyo Ndi masimpe bayo—bayo mupa lugwasyo olo ndo muyanda. Ta ndi konzyi

kubweza boonse. Kuli buyo banji loko, ku masena oonse akuunka. Bala zumanana buyo kuvula a kuvula, mwabona. Elyo—elyo ulayanda kubweza umwi aumwi wabo, pele tokonzyi ku cicita. Pele Ndila zumanana kukomba kuti Leza, mu nzila imwi, uyo cibeleva kabotu kuli ndinywe.

⁵ Lino, sunu masiku, tu yanda kuya ku Lugwalo, a kubala cibeleva ca Lugwalo kuzwa ku Matalikilo, capita ya 3; a kwaamba kujokela aniini ku zintu zimwi ezyo nzyo twakali kwambaula, mu ziindi zya kaina, a kubona ikuti na Mwami Jesu uyo tupa aniini kwiinda kuli eco nco tuya kuziba cindi twazwa. Nda lomba—lomba kuti Uyo cita.

Lino nzoka yakali munyama ulaa maanu loko kwiinda uuli oonse wa mu muunda oyo MWAMI Leza ngwa kalenga. Elyo wa kaamba mu mwanakazi, Inzya, Leza wa kaamba, Nywebo mutakalyi ku musamu oonse wa mu muunda?

Elyo mwanakazi wakati ku nzoka, Inga twalya mucelo wa misamu ya mu muunda:

Pele mucelo wa musamu oyo uuli aakati ka muunda, Leza wakaamba kuti, Nywebo muta kauliyi pe, nekuba kuuguma, kutegwa mutafwi.

Elyo nzoka ya kaamba ku mwanakazi, Nywebo tamu kafwi ncobeni:

Nkambo Leza uli zyi kuti mu buzuba obo nywebo mbo muyoolya, nkabela meso aanu ayoojuka, elyo muyooba mbuli baleza, kuziba bubotu a bubu.

Elyo mwanakazi nakabona kuti musamu wakali mubotu kulya, alimwi kuti wakali kubotezya ku meso, alimwi musamu kuyandika kubamba umwi kuba musongo, wa kabweza musamu wawo, elyo wa kalya, a kupa akwalo ku mulumi wakwe a nguwe; elyo wa kalya.

Elyo meso abo boonse akajuka, elyo bakaziba kuti bakali a cinswe; nkabela bakasuma matu aa mukuyu, a kulibambila zivumbilizyo.

⁶ Akube kuti Mwami ayungizye i...Zileleko zyakwe ku kubala kwa Ijwi Lyakwe. Lino Ndi yanda kubweza cibalo sunu masiku, kuzwa kuli ceeco, a kwiita: *Edeni Ya Saatani*. Cintu ciniini loko cicisa ku kwaamba, ca, *Edeni Ya Saatani*. Ci baanga cileendelana, mu masiku aambi aa Munsondo, Nda syoma, cindi ni Nda kali kwambaula kuli ndinywe kuno kujatikizya *I Kasebyo Ka Muntu Musongo*, a kuyandisya kwa muntu uusalala.

⁷ Elyo ziindi zimwi kutondezya oku kuniini kucisa kuleta cintu cimwi; cila tupa kubala, a kumubikka mu kubala Ijwi. Alimwi eco nco Ndi yanda mbunga yangu yoonse kucita.

“Muntu taka poneni ku cinkwa cilikke, pele ku Ijwi lyoonse lizwa ku mulomo wa Leza.” Aboobo, amubale Ijwi; amu Li bale. Alimwi amu Li bale a meso aa Leza, kupa bupampu bwanu kumvwisya nzila eyo njo tweelede kupona mo mu buzuba buno.

⁸ Lino muku selemuka, sunu masiku, ku kanana biyo kuli ndinywe, ku kwaamba, “Ee, inga Nda cita *eci* na *eco*, . . .”

⁹ Nda botelwa kwaambaula a bantu, nekubakuti mbuli mbwenga Nda botelwa akwalo kuunka ku muunzi antoomwe aumwi wanu sunu masiku. Nda . . . Leza ulizi obo mbwini. Nda botelwa kuunka a umwi wanu, alimwi—alimwi a kulya—kulya kalimbabula a ndinywe cifumo, alimwi—alimwi—alimwi akuunka ku busena akuvwima basikaale andinywe juunza isikati, mwabona. Inga—Inga ndabotelwa kucita *eco*, pele ta Ndi—Ndi konzyi kucita *eco*. Alimwi inga Nda botelwa kuya ku muunzi a kuyo kkala buyo a kubandika kuli ndinywe; kukkala mu kkota kwamana kuswangana, a kukanana a ndinywe kwa kaindi, kwaambaula kuli ndinywe zya makani aa buponi bwanu a makani aa Leza. Inga ndayanda kucita *eco*. Baalumi a banakazi muno; Leza ulizi kuti inga Nda botelwa kucita *eco*, pele ta Ndi konzyi ku cicita. Mwabona, kuli buyo kukwelwa boobu—boobu a kuminwa.

¹⁰ Elyo—elyo mu bukkalo obu bwa kulibilika mbo tupona mo . . . Alimwi Ndili muntu uulibilika, lwangu. Sunu Nda bamba muzeezo wangu kucita cintu cimwi, “Nde elede kucicita,” alimwi juunza ngu mamaile aali milioni kuzwa kuli ndime; cintu cimwi canyonganya a kucita *eci* a *eco*. Elyo ujisi ciindi, kusola kubamba antoomwe kuyeeya kwa busongo bwako.

¹¹ Pele kuzwidilila kwangu kupati nkukambauka Makani mabotu kwiinda mu Mbungano, a kucita coonse *eco* nce Ndi konzya kuleta bulemu kuli Jesu Kristo mu buzuba buno, ne Ndi cili aansi ano, a ciindi nce Nda syaala aaco aansi. Nda boola ku—ku sola kwaamba cintu cimwi kuli ndinywe *eco* cinga camugwasya; cintu cimwi. Nda kabala ni Nda inka ku muunzi cifumo cino. “Ino inga Nda amba nzi sunu masiku, Mwami, *eco* cinga cagwasya bantu abo?”

¹² Kuswiilila ku mulumbe oyo wa nguzu cifumo cino aa . . . Mukwesu Neville ngwa tuletela, kujatikizya . . . Nda yeeya wali mubotu loko, nzila mbwaamba awo, “I dokotela inga walangalanga bulwazi busilikwa; pele muntu uboola a mutiba mupati uukwazeme uuzwide manyeleti, ula yasa ndonga.” Aboobo Nda yeeya kuti *eco* cali ncobeni i—i kupandulula kwa busongo kuniini. Nda yeeya kujatikizya *eco*, “i cizibyo ca malwazi, bulwazi bwamana kuzibwa.” Aboobo *eco* ncintu cibotu maningi.

¹³ Nda li kuyanda kwaambaula cintu cimwi kuli ndinywe, kuleta cintu cimwi caku mumunikila ku cisyomezyo ca Leza ca

bukkalo buno. Mwabona? Cintu cimwi, kutali cintu cimwi eco muntu umwi uumbi oyo wakali mu buzuba bumwi bumbi, pele cintu cimwi. . . alimwi cindi. . . Zyalo zintu ezyo zili kabotu; toonse tu laamba ku zintu ezyo. Pele Nda yeeya kuti inga Nda sola kuleta cintu cimwi ku mizeezo yanu, a Magwalo aya Nge jisi aalembedwe awa, eco cinga ca mumunikila, ku ziba, ku mubamba kuba basooja babotu mu busena obo momu lwanina eno; kwiiya mancenjela aa sinkondo, kutegwa inga mwasinkila zintu zyoonse kazitana sika kuli ndinywe, mwabona. Eco nce cintu cipati, nkwiya kutabulula i—i kuuma kuli ndinywe, kunji mbuli mbo mukonzya.

¹⁴ Lino, atu lange eno kuli eci cipati. . . kwa kaminiti masyoonto, obu buzuba, bwa cibi loko obo mbo twasola kupona mo. Ta ndisyomi kuti kwakasola kuba buzuba obo mbo Nda kasola kubala mu makani aakale. . . Kwakali mazuba mapati loko a mapenzi, cindi bana ba Leza noba kajaigwa mu nzila zyoonse. Pele kubona ciimo calucengo ca sinkondo, ta tunaba a buzuba buli boobu mbu tupona mo eno. Mbuzuba bwa lucengo, a bupyungi maningi. Alimwi cindi Nda bona eco, ci leta eci, kuti, Munakristo uleelede kulibambila akupakamana maningi sunu kwiinda mbwa kasola kuba mu bukkalo buli boonse.

¹⁵ Lino, kaindi mu mazuba a mapenzi, aa Rome, ku Mbungano; Munakristo waka lubizya, wakanjila mu busena bwa zyakucitikila nkabela wakasaninwa ku balavu, na cintu cimwi mbuli eco, cindi no baka mujana kali Munakristo nkambo ka bulunguluzi bwakwe. Pele buntu bwakwe bwa kafutuka, nkaambo wakali musyomi winiwini, wakatakwe bubyaa bi muli Leza, elyo wakatondezya bulunguluzi bwakwe cakukkumana abulowa bwakwe. Mbuli nsinga nozya bbaluka, na zipulo mu mbili wakwe, nkabela bulowa bwakazwa, wakali kunga wakwiila maningi, a lusyomo lwini lwa kusyomeka, a kwaamba, “Kotambula muuya wangu, Mwami Jesu!”

¹⁶ Pele, eno, bupyungi bwa dyabolosi eno, bubamba bantu kusyoma kuti Mbanakristo cindi nobatali obo. Nceeco cintu. Ta mweelede kutondezya. . . Ngu—ngu buzuba bwabupyungi maningi kwiinda mbo cinga caba, kwiinda cindi nokeelede kutondezya buumi bwako—bwako kuzumanana a bulunguluzi bwako. I dyabolosi wabikka tooze toonse twa mancenjela oto ntwaka konzya, ku. . . Ngu sikucenga. Nkabela Jesu waka twaambila, muli Matayo 24, nzila buzuba obu mbo buyooba obo mbo tupona mo, buzuba bwa lucengo maningi obo bwakasola kuba, “kutandila kukozyanya cakuti inga ciyo cenga mbabonya Basale ba Leza ikuti nokwali kukonzeka kuli nguwe kubenga.”

¹⁷ Lino atweezyanisye Magwalo amwi, na zisinsime zyaka kanananwa mu Bbaibbele, zya sunu, a kuceezyanisya a buzuba obo mbo tupona mo eno.

18 Muli Timoteo Wabili 3, twiyya eci, kuti musinsimi wakaamba, kuti, “Ci yoocitika mu mazuba aya, kuteeti bantu bayooba basikainya, balisumpula, basikuyanda misaalo kwiinda basikuyanda Leza.” Amweezyanisye eco eno, kwa kaindi buyo kaniini. Ta tu...Tu lacaamba buyo kaindi kaniini, nkaambo ta tujisi ciindi eco cinji ca kucilangalanga koonse mbuli mbo tweelede ncobeni ku cibweza; pele kucitondezya kuboneka loko, kutegwa inga mwabona cindi mwasika ku muunzi a ku cibala. “Basikainya, basikulisumpula, basikuyanda misaalo kwiinda basikuyanda Leza; bajaya zizuminano, basikulengelzya twaambo, batakkutili, a basampaula abo babotu.” “Lino Muuya ulaamba cantangalala kuti zintu ezi ziyoooba mu mazuba aa mamanino.” Ayo nge mazuba aya, cisinsime kacikanana kuli mbubo.

19 Lino tu labala, akwalo, mu Ciyubunuzyo...14, Ciyubunuzyo 3:14, mubwini, Bukkalo bwa Mbungano ya Laodikeya, obo mbungano mboiya kuba mu buzuba obu bwa mamanino. Alimwi buyooba, Li laamba, “Iyo kkala mbuli mukamufu a kutabula cintu. Ya—ya kali vubide, a kuvula mu lubono, akuta ziba kuti yakali incete, ipengede, isampaukide, yakoofwaala, a ila cinswe, elyo tee yaka cizyi.” I...Lino, amuyeeye, Uli mukukana ku mbungano ya bukkalo obu, “ipengede, yakoofwaala, iliacinswe, nkabela tai cizyi.” Oyo mwaambo wamamanino, elyo Ijwi lya mamanino, nce cicita kubotezya loko. Ba yeeya kuti bakazulwa kabotu a Muuya, boonse balili bambilide. I Bukkalo bwa Mbungano ya Laodikeya ngo Bukkalo bwa Mbungano ya Pentekoste, nkaambo ngo bukkalo bwa mbungano ya mamanino. Luthar wakali jisi mulumbe wakwe; Wesleyi wakali jisi mulumbe wakwe; alimwi Pentekoste yakali jisi mulumbe wayo.

20 Akwalo, Lya kaamba, kuti, “Nkaambo ula kasaala, topyi na kutontola,” kulimvwa kwaanze, buzumini bwa mizeezo ya Makani mabotu; “nkaambo,” Wa kaamba, “uli boobo, Njo kuswida kuzwa mu kanwa Lyangu.” Mu majwi aambi, caka Mu cima kubona mbungano mu ciimo eco.

21 Elyo, amuyeeye, baka Mu swidila aanze; elyo Wa kali aanze lya mbungano, kusola kujoka mukati, mu Bukkalo obo bwa Mbungano ya Laodikeya imbyaabi.

22 I kaleza ka nyika eyi sunu, muntu uukombwa wa nyika eyi sunu, ngu Saatani. Elyo bantu taakwe ncobazi mu kukomba Saatani, pele ngu Saatani kali kozyanisywa lwakwe mbuli mbungano, mwabona, mbuli mbungano. Ba lakomba Saatani, kaba yeeya kuti bakomba Leza kwiinda mu mbungano, pele ni nzila Saatani mba cicita.

“Oh,” yebo waamba, “pele lindila kaindi kaniini; tula kambauka Ijwi.”

²³ Kolanga alimwi awa ku cibalo cangu, sunu masiku. Saatani wakali nguwe waka kambauka Ijwi kuli Eva, lutaanzi, “Leza wakaamba,” mwabona.

²⁴ Oko nkutamwisya kululeme kwa cibeela eco ca Lugwalo olo lweelede ku buzuba. Uyo kuzibya zyoonse Jesu nzya kacita kabotu loko. Uyo kuzibya zyoonse ezyo Musa nzya kacita kabotu loko. Pele cindi wabweza zisyomezyo ezyo nzyo Ba kapa ku buzuba buno, mpawo Eco cakabikwa ku bukkalo bumbi. Eco ngu koonse ncaeelede kucita, mwabona, nku bamba bantu ku Ci syoma mu nzila eyo, elyo oko—oko kwamana. Nkambo, “Tokonzyi kugwisya Ijwi lyomwe kuzwa kuli Ndilyo, na kuyungizya ijwi kuli Ndilyo.” Pele eco nca cita.

²⁵ Bantu, mu nzila ya kutaziba bakomba Saatani, kaba yeeya kuti bakomba Leza; mbuli mbo tucenjezegwa ku cisinsime, mu ba Tesalonika Babili. Kuti, atu bale buyo eco, ba Tesalonika Babili, capita 2. Atwiiwane buyo kwa kaindi kaniini, ikuti na Nda konzya, ndyoonya buyo. Ndi yanda kubala eyo. Buyo, Nda syoma, ba Tesalonika Babili. Ndi jisi Lugwalo awa. Muli Babili. . .

Lino twa mukumbila, bakwesu, ku kuboola kwa Mwami Jesu. . . alimwi ku kubungana antoomwe kuli nguwe,

²⁶ Lino, amubone, “kuboola kwa Mwami, akubungana antoomwe kuli Nguwe,” mbuli Leza mbwaya kubunganya bantu Bakwe kuli Nguwe mu mazuba aa mamanino. “I kubungana kwa bantu ku Mwami,” kutali ku mbungano, “ku Mwami; kubungana antomwe kuli Nguwe.”

Kuti muta fwaambani kuzungaana mu mizeezo yanu, na. . . kukataazigwa—kukataazigwa, kutali ku muuya, naa. . . ijwi, naa ku lugwalo mbuli luzwa kuli ndiswe, mbuli. . . buzuba bwa Mwami buli afwaafwi.

Kutabi muntu uumucenga kwiinda ku nzila zili zyoonse: nkambo buzuba obo tabukasiki, cita kuka saangune kuboola luleyo, alimwi kuti muntu wa cibi (“muntu wa cibi,” amulangilile mbwabede eno), muntu wa cibi akayubununwe, mwana wa lunyonyooko, (oyo wakali Judasi, mwabona);

Oyo uukazya a kulisumpula aatala aali zyoonse ezyo ziiwa kuti Leza, na ezyo zikombwa; kutegwa walo mbuli Leza ulakkala mu tempele lya Leza, kulitondezya kuti ngu Leza.

²⁷ Eco nciimo calucengo ca mbungano sunu! Mwabona, “mwana wa lunyonyooko,” dyabolosi. “I mwana wa lunyonyooko,” dyabolosi. Mpawo, bantu kabakomba Saatani mu buzuba buno, kaba yeeya kuti bakomba Leza. Pele balamukomba kwiinda ku kansiyansiya, tubungwe twa

kabambwa aa bantu a tunsiyansiya oto twa kaleta bantu nkoonya ku kuwa mu lucengo lupati olo nyika ndoitana sola kuziba. Tacikwe makani nzila kunji Ijwi lya Leza mbo lyaka syomezegwa ku buzuba bunu, mbo likambaukwa akutondezegwa, nekubaboobo taba ka Li syomi pe. Ta baka Li syomi.

²⁸ Mpawo nkaambonzi? Tula gambwa na niinzi. Nkaambonzi taciciti; nkambonzi tabaka Ci syomi? Kakuli Leza wa kaamba kuti inga Uyo cita cintu cimwi, elyo Ula cicita, alimwi nekubaboobo bala cifutatila a kuzwa kuli ncico. Mbubonya buyo Eva mwakazi eco Leza nca kaamba, Leza uyo cita; pele waka cifutatila, ku kuswiilila eco nca keelede kwaamba.

²⁹ Amuyeeye buyo, mu makkalo aambi, cakali cintu nciconya lyoonse. Mu bukkalo abukkalo, lyoonse cakali cakuti lyoonse Saatani wakasola kusandulasandula Ijwi kuli mbabo, ku babamba kubona bukkalo bumwi bumbi.

³⁰ Amulange, cindi Jesu na kaboola, mwabona, Saatani wakali mu nkamu eyo ya bamaiyi ba Juda, a ma rabi a bapaizi, kusola kubaambila kubamba mulawo wa Musa, kakuli ndilyonya Ijwi lya kaamba kuti mu buzuba obo Mwana wa muntu uyo yubununwa, mwabona, kuti inga Uyo liyubununa Lwakwe. Aboobo bakali kusola, kufumbwa kuti baka babamba kabali bakombi, alimwi a mulao wa Musa. Sa mwabona eco nca kacita? Wa kali kusola ku baambila, “Eco ncibeela ca Ijwi cili luleme buyo ncobeni, pele Mwaalumi oyu tali Muntu oyo.” Sa mwabona nzila mbwali mucengi? Obo mbo buzuba ncobeni bwa lucengo.

³¹ Mbo bwakabede, alimwi eno mbobubede, Saatani kayaka bwami bwakwe mu nyika. Aako nke kaambo ncobeni nca cicita, nkambo uyanda kuyaka bwami bwakwe mwini.

³² Mbuli simakwebo, oyo tali Munakristo, uyo beleka makanze aakusaala oonse ngakonzya kucita akumubamba kubona cintu cimwi mu nzila iilubide. Ikuti na ulijisi i—i bukanze a mpindu yakwe mu kumubamba kucita eco, kumubamba kucibona mu nzila eyo, uyo mutondezya zintu zyoonse nzya konzya, a mukutantamuna kuzwa ku bwini bwa ncico, nkaambo ujisi buyo nzya yanda. Tacikwe makani nzila mbwa beja a kweena, a kufumbwa zimbi, ujisi mpindu yakwe.

³³ Elyo ako nke kaambo Saatani nca cita eci. Alimwi wabeleka kwiinda mu mulimo kucicita, mbuli Leza mbwa kasyomezya kuti uyo cita. Lino, wakatali a lucengo lwa bukombi mu Edeni, elyo wa kazumanana kuzwa kucindi eco.

³⁴ Kutali kuyaka nkamu ya bana kkomunizimu. Bana kkomunizimu banyina a cintu cakucita a ceeci. Ni mbungano, awo mpo mweelede kulangilila, mwabona. Ta bali—tabali bana kkomunizimu abo bayo cenga mbabonya Basale. Ni mbungano iyo cenga mbabonya Basale, mwabona. Tabali ibana kkomunizimu; tu lizi bala kaka Leza, alimwi

mba sinkondonyinakristo, mbo babede ncobeni, mu mulao, pele tabali *i* sinkondonyinakristo. I sinkondonyinakristo ngu sibukombi, sibukombi loko, alimwi ulakonzya kubalulula Lugwalo, a ku Lu bamba kuboneka antangalala maningi.

³⁵ Mbuli Saatani mbwaka cita kaindi ku matalikilo, wa kabalulula ncobeni zintu zyoonse kuyabuya aans, “Leza wa kaamba, ‘Nywebo mu takalyi musamu oonse wa mu muunda.’” Mwabona, wakali Li balulula ncobeni ku busena.

³⁶ Waa kaamba, “Iiyi, inga twa lya misamu yoonse ya mu muunda, pele kuli musamu aakati ka muunda oyo Leza ngwa kaamba kuti tutakalyi, nkambo, akwalo kutasola kuuguma; nkaambo, buzuba mbo tuyooocita, obo buzuba tu yoofwa.”

³⁷ Wa kaamba, “Oh, ncobeni ta mukafwi pe. Pele andi mupe kaambo Leza nca kaambila eci, ngo kaambo...” Mwabona, ucitanzi eno? Wa kabalulula obu Bwini, mwabona. Wa kaamba, “Uyo jula meso aanu, nkabela uyo mubamba kuziba bubotu a bubu. Muyooba mbuli Leza mpawo, ikuti na mwacita.”

³⁸ Eco ncecico buyo nca yanda kucita, alimwi eco ncintu buyo nciconya ncali mukusola kucita sunu. Kwali lucengo lwa bukombi kuzwa nkoonya ku matalikilo ku Edeni, alimwi nkoluli kuzwa ku ciindi eco. Mu ciindi ca Adamu, lwakali lucengo. Mu ciindi ca Nowa, lwakali lucengo. Mu ciindi ca Jesu, lwakali mbubonya. Elyo eno luli mbubonya, nzila njiyonya, ciimo calucengo cabukombi!

³⁹ Lino, tu yoobona nyika, cindi Leza nakali kuyeendeleya. Lino, cindi Leza nakayi endeleya...kaijisi bweendeleya Bwakwe. Mpawo cindi Saatani naka yeendeleya, kuli mukukaka Ijwi lya Leza. Leza ciindi cimwi wakajisi nyika ku bweendeleya Bwakwe. Wa kaibikka mu mukondo wayo walyonse. Wa kaibikka, kaibamba kuti ibeleke. Wa kacita zintu zyoonse, wakali ijisi ku bweendeleya Bwakwe. Lino tuyo ezyanisya eco Saatani nakamana kwiibweza mu bweendeleya bwakwe.

⁴⁰ Lino, ca katolela Leza myaka iili zyuulu zili cisambomwe. Tii caka Mu tolele bulamfu obo, pele Wa tola cindi cilamfu eco. Myaka iili zyuulu zili cisambomwe, nkaambo tula yiisigwa kuti “buzuba bomwe ku Julu ngu myaka iili cuulu aa nyika,” alimwi yakali myaka iili zyuulu zili cisambomwe, na mazuba aali cisambomwe ayo Leza nakayaka nyika. Lino, caka tolela Leza myaka iili zyuulu zili cisambomwe kwiiyaka, kwiisyaanga a mbuto zibotu a kuleta zintu zyoonse mbuli musyobo wanjyio. Zintu zyoonse zyeedele kuzyala mbuli musyobo wa nzizyo. Zyoonse imbuto Zyakwe zyakali zibotu, elyo aboobo ileedele kuzyala musyobo wanjyio. Leza wakatola myaka iili cisambomwe.

⁴¹ Kumalekelo, cindi Na kamana kwiibamba yoonse, alimwi kumalekelo tu...kumalekelo wakaboola a masena

akweendelezezya, aa nyika, a busena bubotu bukkede kujwe lya Edeni, butegwa muunda wa Edeni. Leza wakabamba masena akweendelezezya aa nyika yoonse mu muunda wa Edeni, mu Egepita, nkoonya kujwe lya kumamanino aa muunda kwakali masena akweendelezezya.

⁴² Elyo aatala a cilawo coonse, Wa kabikka mwana Wakwe a mukaintu wa mwana Wakwe, kweendelezya njiyo yoonse. Mbo mbubo. Eco ncecico Leza ncakacita. Wa kababikka mu bweendelezi buzwide. Ba kali kukonzya kwaamba ku myuwo, elyo yakali kunga yaleka kuunga. Ba kali kunga baamba ku cisamu, elyo cakali kunga casunzuka kuzwa *awa* kuya *awo*.

⁴³ I mulavu a aumpe bakali kulya antoomwe, alimwi kabelele kakali kulala ambabo. Kwakanyina ubi pe. Lwa kali luumuno lulondokede, lumvwanu lulondokede, zintu zyoonse mu bulondosi, alimwi cindi Leza nakajisi mu bweendelezi Bwakwe. Alimwi amubone, Wa kajisi Yakwe... Wa kajisi nyika Yakwe, Wa kajisi zintu zyoonse mu kubeleka. Wa kajisi zintu zyoonse kaziboola. Zintu zyoonse kazilya maani; taakwe cakali kufwa, taakwe cakali kukonzya kunyonyoonwa cabuyo, taakwe cakali kukonzya kusandulwa ciimo. Taakwe... Kwakali lulondokede buyo.

⁴⁴ Elyo aali njiyo yoonse, Wa kabikka bana Bakwe bayandwa, mwana Wakwe mulombe a mwana Wakwe musimbi, mulumi a mukaintu, kuti bayeendelezeze.

⁴⁵ Leza wakakutula loko! “Elyo Wa kalyookezya ku milimo Yakwe yoonse, ku buzuba bwa musanu aabili,” a kusalazya sabata ya buzuba bwa musanu aabili kuli Nguwe.

⁴⁶ Nkaambo, Leza wakalanga aali njiyo yoonse, Na kamana kwiibumba mu myaka iili zyuulu zili cisambomwe a kwiibamba, kwiibamba koonse mu kuboola kuba; akubikka malundu atala, a kubamba ma volukkano kutonta malundu aatala, a zintu zyaka citika kulibonya kwa ndyoonya; yaka yuminina, elyo wakaibamba mu nzila Nja kaikanza. Elyo bwakali busena bweebeka.

⁴⁷ Kwakanyina cintu mbuli njiyo, maparadaiso aa Leza! Elyo ma dainosasi mapati, alimwi kufumbwa zintu zimbi, kaziyavula muli njiyo, a zya banyama bapati; kwakanyina ntenda muli mbabo. Ba kali buyo abuuya mbuli kaaze muniini. Taakwe cintu nco baka jisi pe; kwiina—kwiina kuciswa, kwiina kuusa; kwiina kazunda kamwi ka bulwazi aa nyika. Oh, ino mbusena!

⁴⁸ I bayuni bapati kabauluka kuzwa ku cisamu kuya ku cisamu, elyo Adamu wakali kunga wabaita ku zina, elyo bakali kunga bauluka aatala lya ziwezo zyakwe a—a kulila kwabuuya kuli nguwe. Elyo, oh, ino mbusena bubotu Leza mbwa kajisi!

⁴⁹ Elyo mpawo wakabamba umwi wa bube Bwakwe kuzwa ku Mubili Wakwe Mwini. Leza uli jisi bube mu Mubili Wakwe.

50 Mbuli, uli bube bwa bauso. Elyo, yebo wabona, wakali muli syanyookulu wa syanyookulu wa syanyookulu. Pele, muli eco, kwaamba, tu yoocabaula kuli mbuli nduwe a bauso. Lino, yebo taakwe cintu ncokazi cindi no kali muli bauso. I nseke ya buumi izwa ku mweenze. I mweenze ngu jisi seelo lya bulowa; mwanakazi ujisi i—i iji; eno, aboobo, seelo lya bulowa lijisi buumi muli ndilyo. Elyo, mpawo, ciindi no kali muli bauso, mubwini taakwe cintu nco wakazi kujatikizya ncico. Pele, nekuba, sayansi a Ijwi lya Leza zilatondezya kuti wakali muli bauso, pele taakwe cintu nco kazi kujatikizya ncico.

51 Pele mpawo taata wakali kuyandisya ku kuziba. Elyo a luswaanano lwa kujatana kuli baama, mpawo waka yubununwa kuli taata. Lino, uli bube bwa bauso. Uboneka mbuli mbabo, alimwi uli jisi zibeela zya mubili wako ezyo ziboneka mbuli zya bauso.

52 Eyo, nje nzila Leza mbwa kabede ku matalikilo. Boonse bana balombe ba Leza a boonse bana basimbi ba Leza bakali muli Leza ku matalikilo. Tociyeeyi eno pe, pele wakali kokuya. Wa kali cizyi. Elyo Wa kali kuyanda kuba kutegwe Akonzye ku kwaampa, ku kanana anduwe a ku kuyanda, a kusuka maanza ako.

53 Ena ula yanda mwana wako wini...Sa tabuli buzuba bupati cindi mwana wako nakonzya kuboola ku muunzi a kukkala acuuno ku tafule? Cindi aajoka kuzwa ku busena bwa nkondo, na cintu cimwi cimbi, kajisi mbata koonse; obo mboya kubamba cilalilo; uyo jaya moombe mubotu loko, na kufumbwa cintu cimbi, a kumubambila! Ngu nyama a bulowa bwako bwini, nkabela wakali muli nduwe. Tookamuzyi kaindi, pele wakalizi kuti wakaliko.

54 Elyo aboobo Leza wakalizi kuti tuyooba kuno, pele mpawo Wa katubikka mu nyama kutegwa inga watukwaba. Kutegwa Akonzye ku kwaba, Wa kaba umwi wesu cindi Na kaba Jesu Kristo, Mwana wa Leza Lwakwe, buzule bwa kuyubululwa kwa Leza. Aboobo obo bwakali bukanze bwa Leza, ku tondezya bube Bwakwe mu luswaanano.

55 Ciindi ni Nda kali muli bataata, kwiina nce Nda kazi kujatikizya ncico. Pele ciindi ni Nda kaba mwana wabo alimwi akuzyalwa kuli mbabo, Nda kali bube, i cibeela ca taata. Alimwi uli cibeela ca bauso.

56 Alimwi mbuli bana ba Leza, tuli cibeela ca bube oobo bwa Leza bwakali muli Nguwe, kuba munyama mbuli Mbwa kali munyama, aboobo inga twaba a kuswaangana umwi a umwi, mbuli mukwasyi wa Leza aatala aa nyika. Alimwi aayo ngakali makanze aa Leza ku matalikilo. Iyi, munene. Obo mbwakali kuyanda Leza ku matalikilo.

57 Wa kajisi zintu zyoonse ku bweendelezi. Alimwi Wa kapa bweendelezi muntu mu muunda wa Edeni, kuciimo cakulilemeka mbuli mbwayanda; kwaamba, “Mulombwana, nei cako.”

58 Ino kubota busena oobu! Leza waka kkutila loko, mane Wa ka unka buyo a kulyookezya kuzwa ku milimo Yakwe yoonse. Zyoonse zisamu tii zyaka zyala buyo mamvwa alimwi a mitubetube. Kwiina mumbu zyaka zyalwa ku cisamu ca mamvwa. Zyoonse zyakali londokede. Imbutu zyoonse zyakali londokede. Zyoonse zyakali mu ciimo cilondokede.

59 Lino ciindi na Ka inka kuti a kabe a kulyookezya kuniini, sinkondo Wakwe waka sobelela ca bupyungi, alimwi aku yeendelezya, kwiinda mu kupandulula bubeji mabambe Akwe ku bana Bakwe. Ciindi, Wa kabika lusyomo mu mwana Wakwe Wini; mbuli mbo bikka lusyomo mu mwana wako musimbi ciindi aunka anze masiku a mwaalumi; ciindi wabika lusyomo mu mwana wako mulombe ciindi ainka a musankwa uunywa na a musankwa uufweba. Mwabona, Wa kabika lusyomo mu mwana Wakwe, kuti tako yo cita cintu cilubide, alimwi uyo bamba Ijwi lyoonse elyo Ndya kaamba. Pele sinkondo waka sobelela kunjila; mbuli uulya mumpelenge wini oyo unga wabweza mwana wako musimbi alimwi aku lisofwaazya; na—na mwanakazi umwi uunga wabweza, kwiinka kubusena a mwana wako musankwa, a cintu ncoonya. Mwabona, wa ka sobelela kunjila. I sinkondonyina wa Leza wakasobelela kunjila a ku pandulula buteelede Ijwi kuli Eva.

60 Lino, walo, ku kuwa kwakwe, kwa keendelezya a kunjila Edeni, lwakwe. Wa yeendelezya. Elyo eno wakajisi bweendelezi myaka iili zyuulu zili cisambonwe ya lweeno; kacenga bantu, bana ba Leza, mbuli mbwa kacita kaindi. Nkaambo, bakali a mbaakani yakulisalila ca kucita, kuciimo cakulilemeka mbuli mbwayanda. Elyo mukusyoma kuti inga bayo lilemeka kabotu, na kusyoma kuti inga bayo lilemeka kabotu, mpawo bakaboola a kulilemeka kulubide, nkabela bakasambala bupati bwabo, mbuli Esau mbwakacita, nkaambo ka nyika. Elyo Saatani wakaizunda, elyo waka yeendelezya. Elyo wa kajisi myaka iili zyuulu zili cisambomwe kuyaka Edeni yakwe, mbuli Leza mbwakajisi myaka iili zyuulu zili cisambomwe kuleta Edeni Yakwe kuti icitwe kumaninina. Elyo ku lweeno, lweeno lwa Ijwi, na bantu, eno wakayaka Edeni yakwe iini mu nyika eyi, mu cibi.

61 Edeni ya Leza yakayakwa mu bululami. Edeni ya Saatani yakayakwa mu cibi, nkaambo Saatani ngu cibi. Leza ngu bululami, alimwi bwami bwa Leza bwakayakwa mu bululami, a luumuno, a Buumi. Elyo cilao ca Saatani cili mu cibi, a mu bukombi bwa cibi.

62 Amubone obo mbwaka kacenga, lucengo lwakwe, mbuli mbwa kaamba kuti uyo cita. Wa kasyomezya kucita eci.

Sena muntu uuli oonse ulizi eco? Atu jule kuli Isaya, ikuti na muyanda amwi Magwalo aya. Ikuti mwa...Nde elede kubalulula manji angawo, Nda yeeyela. Atu jule kuli Isaya capita 14, kwakaindi buyo kaniini, a kubona eco Saatani nca kaamba awa, kwakaindi buyo kaniini. Muli Isaya 14, tu lalibala, a kulangilila eco muntu oyu nca kacita. Isaya 14, kutalikila kampango ka 12.

Ino waloka buti kuzwa ku julu, O Lucifa, mwana wa bucedo! Mbobuti mbo gonkelwa aansi, yebo no kakompamya masi!

Nkambo waamba mu moyo wako, Ndi yotanta mu julu, Njo sumpula cuuno cangu cabwami aatala lya nyenyeezi (abo mbana), nyenyeezi zya Leza: elyo Njo kkala akwalo aa cilundu ca mbungano, . . .ku lubazu lwa ku nyiika:

Elyo Njo tanta aatala lya milenga ya makumbi; elyo Njo ba mbuli Sijulu wamajulu.

⁶³ Lino amweezyanisye eco kuboola awa a Magwalo esu aambi mu ba Tesalonika, kaindi kaina, nzila mbwa kaamba, “Ula kkala mu tempele lya Leza, kulisumpula mwini aatala aali zyoonse ziiitwa kuti Leza, kutegwa walo mbuli Leza wakombwa mbuli Leza aatala aa nyika.”

⁶⁴ Nkaako kaleza ka nyika eyi ako nke Nda kakambauka mu Nsondo yainda. Nkaaka mpo kabede sunu mu lweeno, eelyo oora lyalucengo, eco ciindi calucengo nco tupona. Ngu ciindi cabulemu maningi ca makkalo oonse, nkaambo tunjila Mileniumu mpati alimwi; tuli mukulanganya Edeni alimwi. Pele mpoonya aa bukkalo obu, loonse lweeno a mancenjela oonse ayo nga kasola kubelesya a ku konzya kucengya, wa tuyobolola toonse a kuliyumya maningi lwakwe; elyo waka boola ansi mbuli Leza, elyo wa libikka lwakwe mu busena bwa Leza; sibukombi, elyo ulakonzya kubalulula Lugwalo alimwi ulakonzya ku kwaambila Lugwalo, mbubonya buyo mbuli Saatani mbwakacita kuli Eva mu muunda wa Edeni. Pele wakasiya kabeela kamwi ka Ndilyo, nku koonse nkwaakonzya kucita, kubamba mwaakwe oyo, awo njiisyo iijaya ya dyabolosi mpa konzya kuyubununa kulimvwa kwakwe cakwaanguluka, mbuli Kasebyo ka muntu uuyeeya nke twakali kwambaula busiku bumwi.

⁶⁵ Lino, wa kaamba kuti uyolisumpula aatala lya Sijulu wamajulu; uyo tanta aatala lya makumbi a nyenyeezi, elyo uyo kkala kuya mbuli Leza, a kuba aatala lya Sijulu wamajulu. Nkabela wa zwidilila mu kubeleka zintu zyakwe zya kunyonyoona. Wa jisi kuzwidilila ncobeni mu kubeleka zintu zyakwe zya kunyonyoona, kwiinda mu bantu kumulekela kupa twaambo ncolita yeelede, mu makkalo oonse, buyandisi bwa

Ijwi Iya Leza Iyaka syomezegwa ku bukkalo obo. Obo mbo mbubo mbwa kacicita. Mu makkalo oonse, waka Li pandulula kuti taciwo.

⁶⁶ Mu mazuba aa kwa Nowa, wa kapandulula kuti tee cakali kukonzeka kuli njiyo kuti iwe kuzwa ku julu, nkambo, “kwiina mvula kujulu kuya.” Mulumbe wakwe wa zyasayansi mupati oyo ngwa kakambauka mu munda wa Edeni! Wa kali kukonzya kuwaala zibelesyo ku mweezi a kutondezya kuti kwiina mudumo kujulu kuya. Pele Leza wakaamba kuti kuyo boola mvula. Pele Saatani waka zwidilila, elyo wakanyonganya mizeezo ya bantu, kwiinda ku kubbutukiziya kwa sayansi, kuti, “tii cakali kukonzeka kucitwa.” Pele caka citwa. Leza wa kaamba kuti ciyo citwa, nkabela caka citwa. Wa kacita.

⁶⁷ Lino, mu mazuba a—a Jesu, wakacita cintu nciconya. Wa kanyonganya mizeezo yabo alimwi kwiinda ku lweeno, mwabona, kutapandulula kabotu Ijwi. “Ikuti na Yebo uli Mwana wa Leza, eno andi Ku leke ucite cintu cimwi ca ncico.”

⁶⁸ Jesu kwiina naka musangabalisya. Kwiina naka cicita. Leza tali sikusangabalisya. Ta keelede kuvwiila cintu cili coonse eco Saatani nca kalomba. Wa kajisi buyo. . . Jesu wa kaamba, “Ku lilembedwe, “To ka poneni. . . Muntu taka ponena ku cinkwa cilikke, pele ku Ijwi lyoonse lizwa ku mulomo wa Leza.” Mwabona, Taakwe naka musangabalisya, kuzwa kuli nguwe. Ta keelede kupanga cinkwa. Na kakonzya ku cicita, pele nekunga Wa kaswiilila dyabolosi, aboobo taakwe Na keelede kuswiilila dyabolosi.

⁶⁹ Elyo alimwi ngu cibi cabukombi, mbuli ku matalikilo, calweeno maningi. Amucilangilile eno. Tacili buyo cibi cinicini ca mazuba oonse cikulukulu, kucita mamambi a kukolwa, a kubelesya Zina Iya Leza mubuyo. Ta cili ncico. Peepe.

⁷⁰ Mula yeeya myaka yakainda, bunji wanu kuno, basikale basyazibwene, mula yeeya nkambauko nje Nda kakambauka, aa, *Kuusa Kwabulangizi Ku Lubeta*. I sikuvuula, ta kuusigwinsoni kuya. Ulizi oko nkwaya. I cakolwa ta kausigwinsoni kuya. Musambazi wamakoko akunzeacuulu, sinjuka, mubeji, mubbi, taakwe naya kausigwansoni. Pele, muntu oyo uyeeya kuti uli luzi, kuli kuusansonni.

⁷¹ Oyo ngo muntu, kaamba, kaboola kaamba, “Mwami, sa tii Nda kakambauka Makani mabotu, sa tii Nda katanda badyabolosi, mu Zina Lyako?”

⁷² Jesu wa kaamba, “Amuzwe kuli. . . kuli Ndime, nywebo nomucita milandu. Taakwe ne ndakasola kumuziba.” Nkooko kuusigwansoni, mwabona, eco ciimo calucengo.

⁷³ Eco ncecico nce Ndi zumanana. . . awo mpempawo Mpe ntamvugwi kabotu. Takuli kuti Ndi yanda kuba waandene. Ta ndiyandi kuba waandene, pele Nde elede kuba uusyomeka. Ndi jisi Mulumbe, alimwi Oyo weelede kuunka

ku bantu. Ci cibamba kutamvugwa kabotu loko aakati ka bantu. Ba yeeya kuti Ndi lwana bantu boonse. Ni balizi buyo, Ndi wa bantu boonse, a kusola mbwe konzya kabotu kubaleta ku Bwini, mbuli buyo mbo cakakkala ku moyo wangu alimwi anzila mbo cibikkidwe mu Bbaibbele awa. Elyo Leza ula tondezya eco kuti ngo Bwini, aboobo taakwe cintu cimbi cikonzya kucitwa kujatikizya ncico. Aboobo, ababe ba Ci langa, na bataciti.

⁷⁴ Mwabona, ta bayandi ku Bu bona, nkaambo bakaabwa kale, bakasambala bupati bwabo ku kabunga kamwi, kabungwe kamwi; kusoleka bupati bwabo, kusika ku Julu aa mbaakani ya bukombi bumwi bwakabungwe, buli Saatani ngo mutwe wa tuniini toonse. Leza kwiina naka jisi bukombi bwakabungwe, kwiina nakabujisi. Elyo bala lyaaba kuli nkako, oko balo, nkamu ya bantu, nko bapandulula Ijwi a kwaamba kuti Lya amba *boobu* alimwi Lya amba *ceeco*.

⁷⁵ Leza tayandi sikupandulula. Ula pandulula Lwakwe Mwini. Ta yandi muntu uuli oonse uumbi ku Mwaambila nzila mbwa eleede kucicita. Ngu sikulyeendeleya. Wa kaamba nzila Mbwa yakucicita, nkabela eyo nje nzila Mbwa eleede kubamba Ijwi Lyakwe. Cindi Na kaamba, “Ezi zitondezyo ziyo batobela abo basyoma,” Wa kali kwaamba eco nciconya. Kufumbwa cintu Nca kaamba ciyo citika, Wa kaamba kuti ciyo citika mu mazuba aya aa mamanino, kuteeti Uyo cita zintu zimwi, nkabela Wa kazicita. Ta eelede kubuzya muntu uuli oonse ikuti na nciindi naa tacili ncico. Uli zyi kuti nciindinzi, alimwi kuti makanze nzi.

⁷⁶ Lino, Saatani, oyu mucengi, mbuli mbo kwaambwa muli Matayo 24:24, a lucengo lunji loko. Lino, tu jana kuti kwiinda ku mabambe aakwe aa mulumbe wa luzibo, lwiyo lubotu, milao yakulilemeke iisumpukide loko, lusumpuko, a zimwi zimbi, walowa bantu abo bayanda kubelekela Leza, mu kusyoma bubeji bwakwe.

⁷⁷ Eva taakali kuyanda kucita eco, pele waka mutondezya nzila mbuli mbo kwakali busongo bunji muli ncico. Taa kazi; wa kali kuyanda kuziba. Taa kamvwisya, pele wakali kuyanda kumvwisya. Elyo Leza waka mwambila kutasola kumvwisya.

⁷⁸ Mbobuti mbo Ndi konzya kumvwisya kufumbwa zintu ezi? Ta ndikonzyi kuzimvwisya. Nda zisyoma. Ta ndeelede kuzimvwisya. Leza ndusyomo, kutali kumvwisya. Tu syoma buyo eco Nca kaamba.

⁷⁹ Lino, amweezyanisye Edeni ya Leza kuli ya Saatani eno, kwamana myaka iili zyuulu zili cisambomwe ya kusandulasandula bupanduluzi bwini bwa Ijwi lya Leza lyaka syomezegwa ku bukkalo. Atu ceezyanisye eno, a kubona oko nkotusika. Mbuli mbwa kacita ku mbungano mu—mu ciindi ca Kristo, muli Jesu, kusola kukasya—kukasya bana ba

Leza basyomeka kuzwa kukuziba Bwini. Obo mbwa Leza. Leza wakabikka bana Bakwe awa, bube Bwakwe, kuba aluswaanano a Nguwe kwiinda ku kuteelela Ijwi Lyakwe.

⁸⁰ Ino kuti bauso bakwaambila kuti, alimwi uli mwana uusyomeka kuli bauso, elyo wa kwaambila, “Mulombe, utainki mu maanzi ayo kubusena kuya, kuyooyamba, nkambo muli banyama bapati bali mbuli ciwena mu maanzi ayo”; elyo muntu oyo wajoka, kwaamba, “Nincobeni, maanzi mabotu boobu mbuli ayo, kwiina banyama bapati bali mbuli ciwena muli ngawo”? Lino nguni ngoya ku swiilila? Ikuti na uli mwana wakasimpe, uyo swiilila kuli bauso.

⁸¹ Elyo mwana mulombe na musimbi wakasimpe wa Leza ula bweza Ijwi lya Leza lutaanzi. Ta ndikwe makani eco muntu uuli oonse umbi ncaamba kujatikizya ncano, bala bweza Ijwi lya Leza lutaanzi. “Kuli musamu uukola mu nkapu,” elyo bala cisyoma.

⁸² Mukuba aa lusyomo mu Ijwi Lyakwe lyoonse, Imbutu Zyakwe, kaleta Edeni ya busalali, luyando, a Buumi Butamani. Elyo nje njiyo Edeni ya Leza nceya kaleta, busalali. Alimwi yaka leta Edeni ya busalali, bwa luyando, kumvwisya, bulondosi, a Buumi Butamani. Eco ncecico Leza ncali mukusyanga, Ijwi Lyakwe, Imbutu Zyakwe. Obo mbombubo Mbungano Yakwe mbo iya kuba ku mamanino; Ci yooba cintu nciconya.

⁸³ Amubone, ngooyu muzeezo. Muta lubi. Ndi yosika kuli nguwu mu ciindi cimbi na Mulumbe umwi uumbi. Pele, mulizi, Leza wa kaamba, “Imbutu zyoonse zizyale musyobo wazyo.” Sa oyo mulao wa Leza? Lino mbubotunzi ku mukambausi uuli oonse, na kufumbwa muntu umwi, kusola kubamba Ijwi eelyo kwaamba cintu cimwi cimbi? Mwabona, Ijwi lya Leza lyoonse ni Mbuto. Jesu wa kaamba obo, “I sikumiza Mbuto wakamiza.” Aboobo ikuti na Marko 16 ndi Ijwi lya Leza, liyozyala zya musyobo wandilyonya. Ikuti na Malaki 4 ndi Ijwi lya Leza, liyozyala musyobo wandilyonya. Alimwi a zisyomezyo zyoonse zimbi zileelede kuzyala musyobo wa nzizyonya.

⁸⁴ Nywebo mwabona, mwabona Saatani kubusena kuno muku licengeezya? Uli mukusola kwaamba kuti, “Ta cili, tacili boobo.” Sena mwa cimvwisya? [Mbunga yaamba, “Ameni.”—Mul.] Mwabona, Saatani waamba, “Oh, Eco tacili ca buzuba buno. Eco, ngu—ngu...Eco cakali ciindi cimwi cimbi. Eco, eco akwalo ta caambi eco.”

⁸⁵ “Imbutu zyoonse zyelede kumena mu musyobo wa nzizyo.” Eyo nje nzila Leza mbwa kayaka Edeni Yakwe. Sa mbombubo? [Mbunga yaamba, “Ameni.”—Mul.] Elyo njeeyi we, eyo nje nzila Leza mba yaka Mbungano Yakwe, Ijwi lyoonse mu musyobo Walyo! “Muntu taka poneni ku cinkwa

cilikke, pele ku Ijwi lyoonse lizwa ku mulomo wa Leza.” Mwabona? Saatani, uyo bweza cintu cimwi cimbi. Pele Leza wa kaamba, “Imbuto zyoonse kuba musyobo wazyo.”

⁸⁶ Ikuti na cisyomezyo ca kaamba, “Ezi zitondezyo ziyo batobela abo basyoma.”

⁸⁷ Lino mbungano yaamba kuti, “Konjila cikombelo. Kongolola kuloolola kansiyansiya. Koziba katikizimu.” Kwiina zintu zili boobu mu Bbaibbele yoonse.

⁸⁸ Pele Jesu wa kaamba, “Ezi zitondezyo ziyo batobela abo basyoma: mu Zina Lyangu bayo tanda badyabolosi; bayo amba mu myaambo mipya; ikuti na bakabweze nzoka, na kunywa zintu zikola, ta zika bajayi; ikuti na babikka maanza abo a baciswa, bayo pona.” Nguni muntu uuli oonse uukaka Eco? Mwabona?

⁸⁹ “Imbuto zyoonse zika zyale musyobo wazyo.” Ikuti na uli mbuto ya Leza, bube, mwana wa Leza, nkokuti Ijwi lya Leza lyabyalwa muli nduwe. Mwabona? Elyo nkabela cindi wamvwa Ijwi lya Leza, “Mbelele Zyangu zilamvwa Jwi Lyangu; imweenzu tazi kamubeli.” Sa mwacimvwa? “Nkokuti imbuto zyoonse zimene mbuli musyobo wazyo.”

⁹⁰ Lino tu jana kuti, imbuto zyoonse kazizyala musyopbo wazyo, kwakanyina lufu muli impya...mu Edeni eyo. Takukabi lufu mu Edeni impya. Mwabona, takukwe, cintu cimbi pele busalali, kunjoloma, a Buumi Butamani.

⁹¹ Lino, kwiinda ku kutasyoma mu Ijwi lya Leza lyoonse, kwaleta mbuto ya kutasalala mu Edeni ya Saatani. Eno tuli mukunjila mu busena Saatani mwali mukubweza cuuno cabwami, mbuli sinkondonyinakristo, mu i—i Edeni ya nyika eyi, Edeni ya cibi, bukombi bwakasandulwa. Ta katalikila aakuti, “Ndime Saatani. Ndime angelo mupati.” Peepe, kutali aali ceeco, pele aa Ijwi lya Leza lyakasandulwa. Elyo nje nzila mbwa leta bwami bwakwe, mu bukkalo abukkalu. Elyo eno mu bukkalo obu bupati bwalucengo, uli limbambilide kubweza cuuno cakwe cabwami, kwiinda ku bantu bakwe! Uu leelede kuliyakila Edeni ya sayansi, yalwiiyo, a yabupampu; ncibotu, bakambausi basayansi, mbungano ya sayansi, lwiiyo lwazyabukombi bwa sayansi, zintu zyoonse nzya sayansi. Zintu zyoonse zili aa mbaakani ya luzibo. I mbungano mbiizulwa iyakidwe aa luzibo. Ta iyakidwe aa lusyomo pe.

⁹² Ciindi cimwi Nda kanjila kuyooba a kuswaangana mu mbungano ya mwaalumi. Bwakali buyake bupati kumbo. I mwaalumi mubotu, elyo waka kaka zintu ezi nzo twaambaula. Pele nekuba, wa kali. . . Nda kamubotelwa; mwaalumi mubotu, mwaalumi mudaala. Cindi mbunga yakwe no yakazwa. . . Yali kukkazika bantu batandila ku myaanda iili cisambonwe. Cindi mbunga yakwe no yakazwa, ku kuswaangana kwa sikati, kutandila bali cuulu amyanda yosanwe, bakali basongo boonse baka samide kabotu. Nda kakkala awo a kubalangilila.

⁹³ Wa kakambauka nkambauko mbotu loko, mwaalumi wa kacita. Elyo mpawo wa kabuzya na kwakali muntu uuli oonse wakali kuyanda kutambula Kristo; kunyamuna biyo mujulu maanza abo. Elyo taakwe umwi wakanyamuna maanza aakwe mujulu. Elyo kumelekelo mwanakazi waka nyamuna maanza aakwe mujulu. Wa kaamba, “Ncibotu, eno uli Munakristo,” aku mubambila lubapatizyo. Elyo mpawo cindi na kazwa... Wa katuula muvwanda, wakamyonya muvwanda muniini a ku mukombela, nkabela wakamwaya nkamu ya bantu.

⁹⁴ Cindi eyi mbunga no yakazwa; bantu boonse, babotu bayiide, bacikolo. Mpawo Nda kaliimvwi kumbali, kuti ndisuke janza lya mwaalumi a ku mulombozezya coolwe ca Leza, mbuli mbwakali kuzwa.

⁹⁵ Elyo cindi no Nda kacita, mpaawa kwa kanjila nkamu ya bantu. Tee baka konzya kubalekela kunjila kuciindi nkamu yakwe ya bantu noyakacili mo. Mpaawa kwa kaboola yangu, mu mawiluceya, zibwezyo zyabaciswa, majakete kokonyene, basondokede, a zintu zyoonse zimbi. Sa mwabona lwaandano? Nce cico. Eco nceintu nce Ndili mukwaambaula, mwabona. Mwabona, ncintu cimwi candeene.

⁹⁶ Cindi, kwiinda ku luzibo lwa sayansi inga wabamba Makani mabotu *aamvugwa*, kuti, nywebo, “oyo uusyoma aali Jesu Kristo taka pegi mulandu,” mwabona.

⁹⁷ Pele, “Ezi zitondezyo ziyo batobela abo basyoma,” mwabona, ula kacilwa kubikka Eco mukati muya, mwabona. Waa kasyoma aali Jesu Kristo, wa futulwa, ikuti na ezi zitondezyo zya tobela musyomi.

⁹⁸ “Elyo oyo uumvwa Ijwi Lyangu,” kutali buyo kutaminina, kutali ku Li swiilila a matwi aakwe, pele, “ku Li mvwisya.” Kufumbwa muntu inga wa Li swiilila; sikuvuula inga wa Li swiilila elyo kacili sikuvuula; mwabona, cakolwa inga wa Li swiilila; mubeji inga wa Li swiilila elyo kacili mubeji. Pele, “Oyo uumvwisya Ijwi Lyangu, a kusyoma aali Nguwe oyo waka Ndi tuma, uli jisi Buumi buteeli.” Nceeco we, mwabona.

⁹⁹ Elyo taakwe muntu uukonzya kucita eco cita kuti Leza wakamu kanzide kale. Jesu wa kaamba, “Taakwe muntu uukonzya kuboola kuli Ndime, citakuti Taata Wangu wamu kwela, nkabela boonse abo Taata mbaka Ndi pa bayo boola kuli Ndime.” Ameni. Koonse ngu bupati a kukanzwa kwa Leza. Ula pona alikke alimwi kwiina muntu uunga Wa mwaambila ca kucita.

¹⁰⁰ Lino, kwiinda kukutasyoma, mu kutatola Ijwi lya Leza lyoonse, kwaleta imbuto ya kutasyoma, kutasalala, bubyaaabi, luzondo, a lufu Lutamani mu bukkalo obu, bwa bupampu abubyaabi. Eno mwacimvwa na? Mu buzuba obu, kwalo cindi nyika yoonse noili ya bukombi! Sena mwa kalizi eco? Nyika yoonse nja bukombi. Elyo mu bukkalo obu bwa bukombi,

mabungano mapati mu masena oonse aatantamukide; zintu zyoonse, cintu mbicizulwa cimanina muli Saatani kakombwa. Nceeci we, moonya omu mu Bbaibbele. Mbo mbubo. Alimwi omu mu maseminari aya, abupampu azyalwiiyo lwabukombi zyaleta bantu bapampu abo baka yiisigwa nzila ya kukanana, eco cakucita, nzila yakubamba kunyanyamukwa kwabo; a zintu zyoonse mbuli lwiyo lwa mizeezo, myaka yotatwe na yone, kuziba nzila yakubeleka aa mizeezo ya bantu. Mwabona, ngu. . .

¹⁰¹ I Muuya wa Leza tacili cintu cimwi eco, yebo, cika yiisigwa muli nduwe. Ncintu cimwi eco ca kakanzwa muli nduwe, ku janza lya Leza Singuzuzyoonse. Luzibo lwako talukonzyi ku yiigwa na kuyiisigwa muli nduwe. Nku kanzwa, kwiinda ku janza lya Leza a kukanzwa a kukanzwa kwa Leza, muli nduwe. Mbo mbubo.

¹⁰² Lino, ca kaleta Edeni eyi mpati eyo njo tupona mo eno, Edeni ya mbungano ya nyika. Bali muku kamantana eno ku Ecumenical Council mpati, elyo akuyooba a mbungano ya nyika iya bonse kubooba kubweendelezi bwa mutwe omwe, oko Saatani nkwayo kkala aa cuuno cabwami, mbubonya buyo.

¹⁰³ Elyo kwitwa kwa mamanino kwamwaigwa, kuti kujate Nabwiinga Ka tana kunjila muli eco. Nkambo kufumbwa buyo kuba muli eco, ula bweza caando ca munyama, akunyonyooka, taka konzyi kuzwa muli njiyo pe. Ako nke kaambo, ndaamba, “Amuzwe aakati kabo, nobantu Bangu,” kacitana njila muli nguwe, mwabona. “Amuzwe aakati kabo, akuba bandeene.”

¹⁰⁴ Lino, lusulo a lufu, a kwandaanisigwa Kutamani kuzwa kuli Leza, mu Edeni eyi; cisusi, busofwi, lupilingano, (buti?) kwiinda ku kumiza imbuto mbi.

¹⁰⁵ Cindiyezya cilengaano nce Nda kabona ka Ndi tana sola kuswaana bantu ba Pentekoste, kwa Muntu kazunguluka nyika, mu zituba. Mwaka kandimvwa kandi caamba ziindi zinji. Nkabela umwi wa kaboola musule Lyakwe, kamiza imbuto zya lukazyo.

¹⁰⁶ Pele waka cizunda cakululama, muli Eva . . . mu muunda wa Edeni, kwiinda ku cisusi ca Eva ca cibi; cisusi ca Eva, ca cibi. Mpawo, ikuti na Eva wakaba a cisusi ca luzibo, cakali cibi.

¹⁰⁷ Elyo cindi twaba aa cisusi ca luzibo, tuyanda Ph.D., LL.D., ncibi kucita boobo. Oto ntwaambo ntukali, pele obo ngo Bwini. Tacikwe makani mbocili cikali, cicili Bwini, mwabona. Kuba aa cisusi ca luzibo, kumvwisya!

¹⁰⁸ I cintu cancico ngu, ngu, mazuba ano tatusoli kubamba Ijwi lya Leza mu myoyo ya bantu. Tu sola kulipangila zina. Mabungano asola kuyaka njiisyo ya mbungano, mu moyo wa muntu.

¹⁰⁹ Twa kalaililwa kuyaka Ijwi lya Leza. Paulo, wa kaamba, “Tee ndakaboola kuli ndinywe a majwi aakongelezya aa

muntu pe, kuti lusyomo lwanu lukkale mu luzibo lwa muntu; pele Nda kaboola kuli ndinywe mu nguzu; mu kuyubuluka kwa Muuya Uusalala, kuteeti lusyomo lwanu lukkale muli Leza.” Nceeco we.

¹¹⁰ Muntu taelede kuliyakila zina. Tu lacijana aakati. . . Amu leke Leza acitile muntu cimwi muntu a kumutuma ku busena, mula jana kuti muntu oonse kusola kuciiya. Mwabona, basola kuliyakila mazina. Muntu oonse, “Nda kacita eci. Mebo, Ndi, lwangu, kabungwe kangu, mebo, eci,” kuliyakila mazina. Ino tu kambauka makani aanzi, lwesu na Bwami bwa Leza?

¹¹¹ Koyaka Ijwi lya Leza. Ku gwisya kutasyoma a kuyaka Bwami bwa Leza mu moyo wa muntu. Nkabela Bwami bwa Leza tabukonzyi kuyakwa mu moyo wa muntu citakuti Leza wakabamba muntu oyo kuba boobo. Ta konzyi kuyakwa mu. . .

¹¹² Elyo, amuyeeye, cibeela calucengo, bantu bayeeya kuti cili kabotu. Mwabona. “Kuli nzila eyo iiboneka kabotu ku muntu.” Zilenge zyoonse zyaabupampu ziboneka kabotu.

¹¹³ Mbuli mbo Nda kamwaambila Masondo masyoonto akainda; cindi ni Nda kaima muni lya muvwanda wangu naakali kufwa, elyo Saatani kaimvwi awo a kwaamba, “Ngooyo uso, wakafwa mu maanza aako busiku bumwi. Ngooyo mukaintu wako kalede ansi kuya mu i—mu mocali, alimwi ngooyo muvwanda wako waunka. Elyo waka Mu lomba kuti akuvwiile, elyo Wa kamwaya cako. . . Wa mwaya ceelo aatala lyako. Lino, nekuba boobo Ucili Leza mubotu, alimwi nekuba boobo wakaamba kuti Wa kali Sikuponya. Alimwi yebo, mbaani baiminina eco ncokaamba kuti cili luzi, wa kali lubide.” Oh, twaambo toonse, nguzu zyoonse zyakunyama ya mizeezo zyakazumina kuti cakali luzi; nkabela wakali luzi, kuli obo.

¹¹⁴ Aboobo wakali luzi cindi na kaambila Eva, “Meso aanu ayo juka, nkabela muyo ziba ciluzi kuzwa kuli cilubide. Elyo muyooba mbuli baleza, nzila eyo, kwaandanya ciluzi a ciluleme,” nkaambo Leza kwiina naka lekela kuli bona beni pe, kuti bakali cinswe. Aboobo bakalizi kuti inga bayo ziba ciluzi kuzwa kuli cilubide; nkabela wa kali luzi. Pele, nywebo mwabona, ca kaliimpene ku Ijwi lya Leza.

¹¹⁵ Elyo akwalo mbo bacita bakambausi mu maseminari, kwiiya lwiiyo lwa zyaabuleza lwakabambwa aa bantu; inga caboneka kabotu, inga kwaba kumvvisya kubotu kwa cintu, pele cili lubide.

¹¹⁶ Ta tweeledede ku Li mvvisya. Tula Li syoma nkaambo Leza wakaamba boobo, nkabela eco camana kwa lyonse. I cintu coonse, eyo nje nzila yaku Li syoma.

¹¹⁷ Oh, obo Eve mbwaka sukamina kuba a Ph.D., mwabona, obo mbwaka sukamina kuba musongo maningi kwiinda mbwa kabede!

¹¹⁸ Amubone obo kunji mbo kukozyanya, mwaaluni a mukaintu wakwe... Lino amubone, mwaalumi a mukaintu, boonse bakali cinswe mu muunda wa Edeni, Edeni ya Leza.

¹¹⁹ Lino Ndi lajala. Nda amba kuti Njo zumanana kwa maminiti buyo masyoonto. Amulange, amulangilile eno, mbuli mukujala.

¹²⁰ Amweezyanisyeye eci eno, obo kunji kukozyanya ku mwaalumi a mukaintu wakwe, boonse mu Edeni ya Leza, kabatasamide kabbingile komwe ka cikobela, nkabela tee baka cizyi. Ngu kaambonzi nco bakata cizyi? Nkaambo bakali vumbilidwe ku miyeeyo yabo ya ciimo ca cinswe, a Civumbyo Cisalala, ca Muuya Uusalala. Ba kali kukonzya kulangana ncobeni, pesi tee bakazi kuti bakali a cinswe. Ba kali vumbidwe a Muuya Uusalala, wa busalali. Ba kali vumbidwe.

¹²¹ Civumbyo ca Leza, nekuba sunu, konzya kulanga a kuta sukamina. Ba lanyona mitwe yabo. Ngu Civumbyo Cisalala, mwabona, Civumbyo Cisalala. Leza wakabamba meso aabo... boonse ba kali, umwi wakali mwaalumi a umbi wakali mwanakazi, nkabela tee bakazi kuti bakali cinswe, nkaambo busalali bwa Leza bwaka bamba meso abo kuti kaavumbidwe. Amubone, Leza wakasisa manjezeezya abo kuzwa ku cibi, kwiinda ku Civumbyo Cisalala.

¹²² Nikwali kuti twali jisi ciindi cimwi kubamba aali eco, maminiti masyoonto. Amulangisyeye kuno, “Nkambo walo, sikukomba aasalazigwa lweendo lomwe,” ba Hebrayo, “sikukomba aasalazigwa lweendo lomwe, taci jisi limbi manjezeezya aa cibi.” I cibi cakagwisigwa kuli nguwe.

¹²³ Nda mvwa Mukwesu Neville kaamba, cifumo cino; muntu umwi kwayanda wali kumubuzya nkaambonzi nce Nda takambauka aa Muuya Uusalala, nkamboonzi tii Nda cita eci. Nceeci we. I Muuya Uusalala ni nguzu muli nduwe. Ngo Buumi, kutali kunyanyamukwa; kutali citondezyo ca musyobo umwi wakunyama. Pele Ngu Muntu, Jesu Kristo, Ijwi Iya Leza lyayakwa mu moyo wako, ku ponosoya Ijwi lyoonse Iya bukkalo bunu. Ncibotu. Amulangilile Muuya Uusalala mu mulimo, kutali kunji loko mu zitondezyo; pele, mu mulimo, eco Nco ucita kweendelana aa Ijwi.

¹²⁴ Amubone eno Muuya Uusalala, wa Ijwi Iya Leza Lisalala, wakabambide mwaalumi a mwanakazi kuba a cinswe, nkabela tee baka cizyi. Obo mbocili cibotu, Buumi bwa Ijwi; i Mbuto, Ijwi!

¹²⁵ Leza wakaamba, “Kuli musamu aakati ka muunda, mukaintu. Elyo aakati ka muunda kuli musamu oy; mutasoli kuuguma. Nkambo, buzuba mbo muya kuulya, obo buzuba muyo fwa.” Ba kali vumbidwe cabusalali kuzwa kuli ncico, tii bakazi cintu kujatikizya ncico, kutaba acamba ca kuuguma.

¹²⁶ Ba kali vumbidwe cabusalali. Ba kali kwabilidwe mu cilawo ca mayake aa Leza. Ba kali baumi. Taakwe

lufu lwakaliko muni lyabo. Aleluya! Ba kajisi luyando lulondokede kuli umwi aumwi, Buumi bulondokede bwa lyoonse. Ba kajisi luyando lulondokede, kumvwisya kulondokede kwa luyando lwa Leza. Ba kali jisi Ijwi lya Leza, a ku Li bamba. Elyo bakali baumi alimwi bakali kwabilidwe mu Edeni ya Leza, kakutakwe lufu, noluceya, koonse.

¹²⁷ Mpawo, Saatani waka bamba Eva ku swiilila mulumbe wakwe wa lwiyo lwa zwabukombi, mulumbe wa luzibo, kwiiya kusumpukide, milao yakulilemeka iisumpukide, lusumpuko lubotu, lwiyo lusumpukide, a zimwi zimbi; mpawo cindi na kamubamba... kamubamba kwiima a kuswiilila kuli nguwe kaindi kaniini, ku kubuzyabuzya kwakwe (oko nko twa kalaililwa kusowa), cindi na kamubamba ku swiilila kuli nkuko.

¹²⁸ “Lino, amulange kuno, mbungano ngu *boobu-a-boobu*. Ya kayakwa kwa ciindi cilamfu loko. Tuli imwi ya mabungano aakaindi maningi mu cisi. I silutwe wa dolopo nkwaunka.” Ta ndikwe makani mboibede, mwabona. Ikuti na ilwana Ijwi lya Leza, ko cilwana. Oyo ngu sinkondonyokwe. Kufumbwa cintu eco cilwana Ijwi ngu sinkondonyokwe.

¹²⁹ Zintu zyoonse ezyo ziiminina Ijwi ngu munyoko. Ngu cibeela cako.

¹³⁰ Amubone, waa kavumbula Civumbyo Cisalala, kuti abone na lulalano mbo lwakabede ncobeni; amwezyanisye eco, obo cisusi mbo cikonzya kucita ncobeni. Waa kavumbula Civumbyo kuzwa ku meso aakwe, cintu cisalala eco Leza nca kabikka aa meso aakwe. Waa kali kuyanda luzibo, kuziba makani oonse aa bukanze bwaco bupati; mpawo waa kavumbula Civumbyo kuti azibe bukanze bwaco bupati. Waa kaswiilila kuli dyabolosi, elyo amubone busena molwaka mubikka.

¹³¹ Ba kacita nciconya mu bukkalo abukkalo kuzwa ciindi eco, lyoonse kubweza cibeela cabupampu; elyo eno wayaka bwami bwa Saatani, luzibo, mbuto yakwe nja kasyanga, nkabela yabweza nyika kuba Edeni ya lufu.

¹³² Lino amubone. Lino amulange ku Ciyubunuzyo 3, Bukkalo bwa Mbungano ya Laodikeya. Amwiyeeye mu mizeezo yanu.

¹³³ Lino amubone. Walo, Eva, ngu namalelo wa Saatani. Mwabona, Saatani, nzoka, yakasika kuli Eva Adamu katana sika kuli nguwe. Mwabona? Mbo mbubo. Aboobo wa kamoongelezya, mwabona; aboobo Saatani, nzoka, wakali mulumi wa Eva Adamu katana sola kumulala. Mwabona, wa kamoongelezya. I Bbaibbele lya kaamba kuti wakacita, elyo waa kaziba kuti wakali cinswe, mpawo. Mwabona?

¹³⁴ Lino amulange ku—ku Bukkalo bwa Mbungano ya Laodikeya. Walo, Eva, kakkede mbuli namalelo wa Saatani. “Uuli vubide mu zintu zya nyika; uloofweede, ulicinswe alimwi, nkabela ta cizyi,” mbubonya buyo mbo cakabede mu Edeni ya Leza. Pele eno, kutali kuti Civumbyo Cisalala

cili ku busyu bwakwe pe, pele civumbyo ca cisusi. Eco, waa kavumbula Civumbyo Cisolala ca Leza, a kusama civumbyo ca luzibo, ca cisusi. Elyo eno ujisi civumbyo ca cisusi, ca kuti “uliofweede” kuli ncico kuba cibi. Uli a “cinswe” mu kagwagwa, “alimwi ta cizyi.” Ngu sikuvuula mu kagwagwa. Banakazi kaba samide tubbudula, ku meso aa Leza, ngu sikuvuula, “elyo ta cizyi.”

¹³⁵ Amubone, amubweze banakazi besu. Lino, ikuti na muyanda kubona ciimo ca mbungano mboyibede, amulangilile nzila banakazi mboba lilemeka. Lyoonse ulaiminina mbungano. Mu Edeni ya Saatani, ya cibi a kutasyoma, lupilingano lwa bukombi; bwami bupilingene. Mu busena bwa kubweza Ijwi lya Leza, bakabweza kwiiya kwa bupampu bwa muntu. Alimwi mu busena bwa kubweza Mbungano, bakabweza kabunga, alimwi bali mukukaleta ku bweendelezi bomwe bupati.

¹³⁶ Lino amubone, kupilingana kuzwa ku kutabisya. Muta kakilwi kumvwa eci eno. I mbungano yasama civumbyo eci ca cisusi. Amubone nco cacita kuli nguwe. Ca—ca mupilinganya kuzwa ku kutabisya kuya ku luzibo. Mwabona? I Civumbyo Cisolala, taakwe ncaakazi; a civumbyo ca cisusi, ngo luzibo. Ulizi lulabotezya. Ulizi nco lucita, mwabona. Ngo mucelo, musamu uyandika, kubamba umwi kuba musongo. Mwabona? Uli pilingene kuzwa ku kutaziba kuya ku luzibo, kuzwa ku busalali kuya kubusofwi a cisusi, a kuzwa ku Buumi kuya ku lufu.

¹³⁷ Obu bwami bwezele kufwa. Obu bwami buyo fwa! I Leza wa Julu uyo bunyonyoona kuzwa ku busyu bwa nyika.

¹³⁸ Amubone, mu lupilingano olu, lulaba kuzwa ku mwaalumi kuya ku mwanakazi, a kuzwa ku mwanakazi kuya ku mwaalumi, “alimwi taba cizyi.” I mucelo nguonya mubotu wa Edeni ya Saatani, ikuti na mwalangilila mu tugwagwa mazuba aano, ku bantu besu basunu.

¹³⁹ Amubone, wakali Eva oyo Saatani ngwa kabelesya kubamba Adamu kuti a bisye kwiinda ku nguzu zyakwe zya cisusi. Lino nciconya, kucita cintu nciconya mazuba ano. Amubone, masusu aageledwe, masyu apentedwe, kasamide cabwaamu, mwabona, ula cita eco, a kutaziba kuti cimwi acimwi ca zintu ezyo ziliimpene ku Ijwi lya Leza. Ku gela masusu aakwe, cimubamba kuba mwanakazi uubaukide, sikuvuula. Ku sama tubbudula, ci mubikka mu ciimo ca mause aakwe. Ulasama zisani zya bwaamu, ci mubamba kuba sikuvuula. “Nkabela ta cizyi,” kutali nkaambo ka busalali bwa Leza; nkaambo ka cisusi ca Saatani. Waa kamucitya ku. . . Ula citya Adamu wakwe kuba a cisusi cakwe.

¹⁴⁰ Waa kasamununa zisani ezyo Leza nzyaka musamika, kaindi mu Edeni, zya lweendo lwakwe kwiinda i—mu nkanda. Waa kasamununa. Waa kali samununa kumaninina. Kakuli,

Leza wakamu vumba khona ninina mu zikutu; wa katalika kugela aniini ciindi aciindi, eno waa jokela kubusena nkwakabele ku matalikilo.

¹⁴¹ Lino wacitya Adamu wakwe kusama tubbudula twa kungsi. I mwaalumi kusama tubbudula tuboneka cikaintu twakaindi tuniini, a kuunka ku masena awa, ta Ndi yeeye kuti kuli ciimo cabwaalumi kuli nguwe. Ngo muntu uukompeme maningi ngo Ndi zyi. Mwabona? Mwabona, waa kabamba Adamu wakwe wakapilingene kulilemeka mbuli nguwe, mwabona, kasama tubbudula twa kungsi. Wa kabona ncakali kukonzya kucita kubusena kulaale cindi naka samununa zisani zyakwe zyoonse a kusiya tumwi twa kungsi. Oto ntubbudula. Mubwini, ezyo nzisani zyakungsi zya mwanakazi, elyo awa Adamu wakwe uli mukutusama eno. Cili, kweendelana aa Ijwi lya Leza litaanzi, “Ngu cisesemya ku mwanakazi kusama zikobela zya mwaalumi, a mwaalumi kusama zikobela zya mwanakazi,” kuzwa ku Ijwi litaanzi. Amu ciyeeye!

¹⁴² Lino, uloosa zikuti zyakwe ku nkumu, awalo. Ula kamuna masusu kuyaansi, akubikka rola muli ngawo. Kumwi kuboneka kucima maningi nko Nda kasola kubona mu buumi bwangu, mbaabo bamwi bana ku masena awa sunu a zikuti zyabo kazikamwidwe kuyaansi mbuli *boobu*, aajisi mubala, masusu aakapendulwa, ajisi musyobo umwi wamusamu wa cintu cimwi ca perokusaidi, a kupendula masusu aabo, a kwaazinga mu ma rola, kupanga zikuti ku nkumu. Yebo o muntu mupati uukompeme! Eco ncintu cibyaabi loko kwaamba kuzwa ku cikambaukilo, pele lubeta lutalikila ku ng’anda ya Leza. Tozyi akwalo kuti naa uli mwaalumi na mwanakazi. Alimwi Nda kamvwa kuti Impi yesu ya United States iboola mu tubbudula lutobela. Mbo mbubo. Sa mwabona lupilingano mbolubede? Ngu zikobela zya mwanakazi; uloosa zikuti zyakwe ku nkumu.

¹⁴³ I buzuba bumwi Nda kali ku busena, bwa Howard Johnson; kutali oyu umwi kuno, pele umwi uuli mu lweendo kuya kumwi. Elyo Nda kakkala buyo musule mu kugambwa. Mpaawa kwa kaboola mulombe muniini ambali, a mulomo kawaaseme. Elyo wakajisi masusu aasiya *awa*, nkabela wa kaakamuna atala munzila *eyi*; a kubikka rola muli ngawo, a kwaazinga atala koonse, ampela lya meso aakwe; kasondela aatala lya meso aakwe, keenda koonse. Ikuti na Nda kasola kubona lupilingano! Mwabona, inga nataka cisyoma. Wa kali kukonzya kutondezya ndiza kuti wa kali mulombwana, pele mu muuya wakwe ngu mwanakazi. Ta zyi kuti ndubazu nzi lwa ng’anda nkwa zulilwa. Mbo mbubo. Mboluli lupilingano!

¹⁴⁴ Eco ncecico Saatani nca cita. Ula pilinganya zisi. Ula pilinganya mbungano. Ula pilinganya bantu. Ngu silweeno, sikupilinganya wa Bwini butaanzi.

¹⁴⁵ Leza wakapanga mwaalumi kuba mwaalumi. Wa kapanga mwanakazi kuba mwanakazi. Elyo Wa kabasamika bwandeene, elyo Wa kababambila kukkala mbubonya obo a kulilemeka mbubonya obo; umwi wabwanakazi, a umbi wabwaalumi. Wa kaidanya Adamu mu muunda wa Edeni, akucita eci, kaidanya Eva kuzwa kuli nguwe.

¹⁴⁶ Lino uloosa zikuti zyakwe ku nkumu; ula gela masusu aakwe mbuli aa mwaalumi, elyo ula sola kusama mbuli zya mukaintu. Mwabona? Ula sama zikobela zyakwe ziteelede, elyo ula sama zisani zya mukaintu zyamukati. Lino, eco cili vwisya kusanka cintu cisalala, pele ta Ndi caambi mu nzila eyo. Ngu Bwini bwa Makani mabotu ncobeni. Ikuti na tocizi, nkokuti kuli cintu cimwi cilubide kuli nduwe; uli ofweede na tonaba mu tugwagwa. Elyo mukaintu ulayeeya a mulombwana ulayeeya kuti cili kabotu, bali mukusumpuka ku busena bumwi.

Banakazi baamba, “Ee, kulapya maningi!”

¹⁴⁷ I bama India baku Apache bakaindi ku masena mulaale inga bamubamba kuti mufwensoni nobeni. Ibajana kupya maningi, noba sama zisani zinji, kuta bulula zuba kuli mbabo; oh, cibamba kuzwa nkaasaalo, nywebo inga mwaba a eyakkondishina cindi bano enda. Mwabona? Ba laima ncobeni mu busena bwa zuba.

¹⁴⁸ Inga tii mwakonzya kwiimina cintu; inga mwa bbamauka a kupya. Pele, mwabona, ngu ceeco nco mwiita kuti lwiiyo lusumpukide. Sayansi ya sunu ya leta eci. Oh, ma! Ngooyo mbwabede, “ulacinswe,” mu Laodikeya, “elyo ta cizyi.”

¹⁴⁹ Waa kali a cinswe mu Edeni. Amubone mami aya alakozyanya? Bumwi mbwa cibi a lufu; bumwi bumbi mbwa Buumi a bululami. Mukati muya waa kali vumbidwe a Civumbyo Cisalala. Ba kali aa cinswe boonse; pele tee baka cizyi. Kwiina makani oonse ngo bakali ancico, nkaambo bakali vumbidwe a Muuya wa Leza.

¹⁵⁰ Elyo mpaawa bali vumbidwe a cisusi, nkabela bala langana ku...Mwabona, Adamu wakali kunga walanga kuli Eva, elyo takazi kuti wakali aa cinswe. Pele eno a civumbyo eci ca cisusi, ta mwisyi kuti uli aa cinswe, pele ula cicita kungsi lya civumbyo eci ca cisusi kuti aongelezeye mwalumi kumulanga. Ngu cintu buyo nca konzya kucicitila. Nywebo tamusyomi eco, pele amucicite munzila iili yoonse, elyo mwaalumi alange. Elyo wa kajana kuti ujisi ku kweelelezya kunji loko, mane ula sika koonse a kusama zisani zyako aali nguwe.

¹⁵¹ Oh, ino ndupilingano! Ino mbukkalo! Ino nciindi nco tu...Obo mbocili ca lweeno! Oh, zintu ezi zyoonse, “elyo ta ba cizyi,” muuya upilingene ncobeni uli mu mwaalumi. Uli vumbilidwe kuzwa ku cisusi ca Saatani, a mwanakazi, awalo. Ngu muuya wa saatani wa nsangano impati. Mwabona, elyo tabazyi, pele bakaba kabunga. Banakazi basamide

tubbudula, bazulilwa ku kabunga. Mwaalumi uusamide mbuli obo, uli aa kabunga. Ndi yoomupa bwaambe bufwaafwi bwa ncico, B.S.S., Big Sister Society, [Nsangano Ya Bacizi Balemekwa—Mul.] aboobo nkuba zulilwa. Amuzwe kuya, nsangano ya bantu balemekwa bakompeme, kaba samide tubbudula tuniini twa kungsi, kuboneka mbuli kancinda kapati kakaindi, cintu ciboneka tombe. Nda—Nda . . .

¹⁵² Mwaalumi, eno uyo impana andime a ceeci, pele ngo Bwini. Wa kapilinganisigwa elyo to cizyi. Toli obo, tocililemeki limbi mbuli mwaalumi. Mwabona, kuba kuteta maningi; alimwi, mwana wabo, tacikabi limbi cintu kuli mbabo; baalumi, a banakazi, abalo. Ba kaba nsangano. Nkaako kabunga. Nkamboonzi? “John, ng’anda iicilila, uulasama tubbudula, aboobo nkaambonzi ta Ndi konzyi kusama? Luella wakali kuyanda kuti nditusame nkaambo John wakali kusama, ng’anda iicilila. Alimwi, ee, ikuti—ikuti Susie Jane ulakonzya kusama, nkokuti Martha Jane ulakonzya ku tusama, na Susie Lou,” na kufumbwa zina lyakwe mbolibede, mwabona. Mwabona, ni nsangano. Ngu kabunga. Uzulilwa kuli nkako kumuuya, elyo to cizyi.

¹⁵³ Elyo ikuti na ciliboobo, elyo tu labona kuti ciliboobo, nkokuti uli ofweede. Uli ofweede mu tubungwe oto kuteeti Saatani waka muzambaila. Alimwi nkupilingana kwa Ijwi lya Leza litaanzi, a Bwami Bwakwe, a makanze Aakwe aa bana Bakwe. Saatani waka zambaila baalumi a banakazi mu zintu ezi, elyo taba cizyi. I lupilingano!

¹⁵⁴ Tacili mwana wa Leza! Zikuti kazilengelela ku nkumu yakwe, elyo kasamide kabbudula, kaya buselemuka mu kagwagwa; mwana wa Leza, kali daikona mu mbungano, mweembeli mu cikambaukilo? Peepe, oyo tali mwana wa Leza. Kwiina nakainda mu Kasebyo ka kuyeeya kwa Leza. Inga nata balekela balo kusama zikobela zya banakazi ezyo; masimpe inga nataka cita; awalo mwanakazi kuta sama zikobela zya mwaalumi. Mwabona, tali mwana wa Leza. Ngu mwana mulombe wa Saatani, a mwana musimbi wa Saatani. Ncintu ciyumu kwaamba!

¹⁵⁵ Saatani wazwidilila kupilinganya a kweendelezya nyika eyi, a kwiibamba kuba bwami bwakwe; awo muntu mpa kabikwa, kwiinda kuciimo cakulilemeki mbwayanda, kuli salila beni musyobo wa buumi mbo bakali kuyanda. Nkabela eco citondezya eco cili mu moyo wako. Mwabona? Jwi lyako. . . Sa mu lizi? Micito yako ilaamba maningi, ila tontozya jwi lyako. Uh-huh!

¹⁵⁶ Amu leke ndiinke ku muntu. Elyo nda amba, “Oh, Nda. . . Toonse tuli Banakristo. Tu zulilwa ku mbungano.” Elyo zifwanikiso zyaku sangabalisa kwa kusama kwacisapi ka zilengelela koonse mu ofesi lyakwe? Huh! Inga tii cabamba lwandaano kuli eco ncaka ndaambila, inga Nda ziba kabotu; mbubonya anduwe.

¹⁵⁷ Amu leke mwanakazi aambe kuti Munakristo, kajisi masusu mafwaafwi? Huh-uh! Yebo ulizi kabotu kwindi eco, mwabona. Iyi, munene. Amu muleke aambe kuti Munakristo, kanana misila a kulipenta, a tubbudula, a kwaamba kuti Munakristo? Yebo ulizi kabotu kwiinda eco. I Ijwi lya Leza lila kuyiisya kabotu kwiinda eco. I Ijwi lyaamba kuti takonzyi ku cicita a kuba Munakristo. Waa kubauka akwalo, a zintu zyoonse. Mbobuti Leza mbwaya kubikka cintu cuubaukide mu Bwami Bwakwe? Peepe, munene, kwiina pe. Peepe, munene. Beni, bala tondezya kuyanda kwabo.

¹⁵⁸ Tokonzyi kubamba nziba kulya antoomwe a luunga, kwiina pe. I nziba tajisi mululwe uuli oonse. Ta ikonzyi kulya mutunta oyo wakabola wakaindi. Ikuti na yalya kabeela kaniini, inga kaijaya, elyo ili cizyi. Pele luunga ulakonzya kulya kanji kufumbwa cintu nca yanda. Mwabona? Ulijisi mululwe munji.

¹⁵⁹ Aboobo mpawo mujana kuti, eyo nje nzila mboibede ku nyika mazuba aano, cintu nciconya, “Bali aa cinswe, mboofu, nkabela taba cizyi.”

¹⁶⁰ Saatani wakacicita kwiinda ku cisusi ca mwanakazi ca ku luzibo, ca lulalano, eco ncakasala kwiinda ku kusala kwakwe mwini. Lino amubone, wakali Eva wakasololela Adamu ku bulubizi, alimwi wakali mwanakazi oyo wakavumbula zisani zyakwe Adamu katana samununa zyakwe. Mwabona? Ngu mwanakazi, lyoonse. Mbu cibede lyoonse. Ci cili nzila njiyonya.

¹⁶¹ Ni mbungano iisololela mwaalumi kuti asweeke. Ni mbungano, mwabona, iisololela mwaalumi oyo wakali kuyanda kuba mwana wa Leza. Ngu mwanakazi, mbungano. Kutali Bbaibbele, Leza, nkambo Bbaibbele ngu mwaalumi. Oh, inzya, “Ijwi lyakaba mu mubili wabuntu,” elyo Wa kali Mwaalumi. Mwabona? I Bbaibbele ngu mwaalumi; mbungano ngu mwanakazi. Mwabona? Ta ili mbungano... Bbaibbele lisololela mwaalumi kuti asweeke. Ni mbungano imu sololela ku kusweeka. Ni mbungano nja keenda antomwe yakali a cinswe, kutali Bbaibbele. Mwabona? Peepe, ncobeni. I Bbaibbele lila mwaambila kuti ula cinswe. Iyi, munene.

¹⁶² Lino amubone nzila, kwindi ku lulalano, kuyanda kwa lulalano, wa kasukamina luzibo, kuziba eco kuti cakali eci, a nzila, naa oyu mucelo wakali mubotu na pe. Elyo waa kacicita.

¹⁶³ Leza uyo cijosya buzuba bumwi, nekuba, kwiinda ku Mwaalumi. Ca kalekwa biyo a mwanakazi. Pele caka nununwa kwiinda ku Mwaalumi; Mwaalumi, Jesu Kristo, uli ngu Ijwi.

¹⁶⁴ Elyo mpawo ncinzi? Amubone, mu kujala. Kuno kutali ciindi cilamfu cakainda, Nda kaamba kaambo. Ndi jisi mapeegi aali otatwe na one mukati muya, pele Nda... aa Magwalo a zintu nze Nda likuyanda kwaamba. Pele, amusiilile. Atu jale, mu kwaamba eci.

165 Amuyeeye, kuno kutali ciindi cilamfu cakainda, Nda kali kuyiisya Myeembo ili Ciloba, *I Pobwe Lya Myeembo*, a zimwi zimbi. Elyo Nda kaamba, “Kuli buzuba bwa lusele ibwa kusekelela kwa bukombi.” Aboobo, buzuba bwa ciloba buyooba bwa mamanino, eyo iyooaba Mileniamu. Pele kuli cipobwe ca buzuba bwa lusele; cili, ikuti na cakali calusele, nkabela kuli buyo mazuba aali ciloba, inga cabubamba kuba buzuba butaanzi alimwi, kujoka nkoonya ku buzuba butaanzi. Mpawo, kwamana Mileniamu, mpawo kuyooba Edeni yakayakwa alimwi. Bwami bwa Leza bupati buyo josegwa. Nkaambo, Jesu wakabulwanina akubukazizya aa Saatani, mu muunda wa Gesimani, elyo wakazunda kujosya Edeni; uuli, Wa kanka kuyo bamba ku Julu, ku bweeda alubo, kuya ku Julu. Wa kaamba, “Myoyo yanu ita kataazigwi.”

166 Cindi ni Nda kali ano aa nyika, Wa kaamba, “Nywebo, nywebo noma Juda, mwasyoma muli Leza. Lino, Ndi zyi Ndi jisi zina bbi,” Wa kaamba. “Elyo baamba kuti Ndili *boobu*, a *bumbi*. Pele, mwasyoma muli Leza; elyo mbuli mbo mwasyoma muli Leza, amu syome akwalo muli Ndime.” Wa kali Leza, wakayubununwa. Mwabona? “Amu syome akwalo muli . . .”

167 “Mu ng’anda ya Taata Wangu kuli manji. . .” Na, “Mu cisi ca lubono lwa Taata Wangu, mu mabambe aa Taata Wangu kuli masena aa bwami manji. Njo inka nkabambe busena.” Amulange mbo buli bulamfu, mamamile aali myaanda ili kkumi ayosamwe aa busena bweelene koonse! Kwaamba, buli kuli? Wa kanka kuyo bubamba. Ngu Cilenga. Ula lenga boonse obo bwa ngolide. I tugwagwa tula balangala. Ngu Cilenga. Uli mukubamba busena. Kuya mu Ciyubunuzyo 21, wa kaamba, “Elyo Nde Johane ndakabona Muunzi uusalala, Jerusalema Mupya, kauseluka kuzwa kuli Leza ikuzwa ku Julu.”

168 “Kwiina nokwaka cili lwizi; julu taanzi a nyika ntaanzi zyakaloba.” Ino julu lyesu litaanzi lyakali nzi? Lyakali Mileniamu. Ino nyika ntaanzi niinzi? Yakali eyi. Iyo bambululwa. Mbuli buyo mbo yaka bapatizigwa kwa Nowa, mu mazuba aa kukambauka kwakwe; yaka salazigwa aa Kristo, mbuli Mbwa kasansaila Bulowa Bwakwe aali njiyo; a kubambululwa, kugwisya tuzunda toonse a zintu zyoonse zyayo, mu kubambululwa ku mamanino, a lubapatizyo lwa Mulilo olo luya kujaya tuzunda toonse, kuciswa koonse, malwazi oonse, tombe lyoonse elyo lya kasola kuba aa nyika.

169 Iyo bbotoka, akuleta Nyika Mpya. “Elyo Nda kabona Julu Pya a Nyika Mpya. Julu litaanzi, nyika ntaanzi, zyakaloba; elyo kwiina nokwa kacili lwizi. Elyo Nde Johane ndakabona Muunzi mupya, Jerusalema Mupya, kauseluka kuzwa kuli Leza ikuzwa ku Julu.” Kuya Leza uyooba a bube Bwakwe bwakasimpe, bana balombe a basimbi, oko Nkwa konzya kuswaangana a mbabo mu busalali, a meso aabo akofwaala ku cibi cili coonse. Takucikabi cibi limbi kuzwa waawo.

¹⁷⁰ Atu kakatile canguzu; muta cengwi mu buzuba buno, pele, “amukakatile kunjila mu mulyango.”

¹⁷¹ “Nkambo boonse abo bayo siigwa bayooba basibwaamu, bazisusi.” “Kufumbwa muntu uulanga aa mwanakazi cakusukama wacita kale mamambi awalo.” Boonse a... aanze bayooba banakazi batakwe bulemeke, baalumi batakwe bulemeke, a bamwi bambi.

¹⁷² Elyo abo buyo bakanununwa, abali mu Bbuku lya Buumi lya Mwanawambelele, bayo njila mu mulyango. Aboobo amukakatile, no beenzuma; muta cengwi mu buzuba buno bwa mamanino.

¹⁷³ Eci nciindi cipati. Bantu boonse bali jisi mali. Bantu boonse bala konzya kucita *eci*, alimwi bantu boonse bala konzya kucita *eco*, nkabela mali ala kunka mu nzila zyoonse, a myootokala mipati, a zintu zyoonse. Takukabi comwe ca zeezyo mu Muunzi oyo. Takukabi mootokala omwe, ndeke yomwe. Peepe. Lu yooba antoomwe lusumpuko lwandeene. Luyooba lusumpuko alimwi lutali lwa luzibo, lutali lwa sayansi, pele bwa kutabisiya, a lusyomo muli Leza muumi.

¹⁷⁴ Atu kakatile kunjila Omo. Nkambo obo mbo bukanze bwangu boonse, mbwa kunjila mu Muunzi oyo buzuba bumwi; a kucebuka buyo, kuboola antoomwe a ndime, kubona umwi aumwi wanu ka mumacing’a, cindi twa kwiimba, “basalali banjila kabaya bu macing’a.” Ndi yanda kuyooba mu mweelwe oyo cindi basalali kabanjila kaba macing’a.

Atu kombe.

¹⁷⁵ Oyandwa Taata Wakujulu, mbuli mazuba mbali mukuswena, elyo twa bona kaaswena, cisyomezyo caswena. Twa komba, Oyandwa Leza, kuti Uyo bikka *eco* aa myoyo yesu, kutegwa tu talubizyi kuli koonse. Oyandwa Leza, kobamba manjezeezya eesu kuti kaasalala. Kobamba myoyo yesu kiivumbidwe, Mwami, meso eesu kaavumbidwe ku zintu zya nyika, a zintu zya buyo zya nyika, bulemu bwabuyo kuba muntu umwi uulemekwa ncobeni.

¹⁷⁶ Takukwe makani obo mbo bali bapati, bami boonse, bamami ba zisi, abasololi banguzu zinji, a zintu zyoonse zimbi zyeedele kunyonyooka, alimwi tazikabuki mu bubu...mu bubuke butaanzi. Nkambo kuli lembedwe, “Ulacoolwe oyo uusalala uujisi cibeela mu bubuke butaanzi, aali oyo lufu lwabili talukwe nguzu.” O Leza! “I lufu lwabili,” lufu lwa kumuuya, “talukwe nguzu”; wa kanununwa!

¹⁷⁷ O Leza, kuyeeya kuti limwi lya maora aya, umwi uyo swaya umbi, a ku kwempwa. “Bobile mu bulo; uyobweza omwe, a kusiya omwe. Bobile mu muunda; Njo bweza omwe, a kusiya omwe.”

¹⁷⁸ O Leza, tugwasye kuti tu salale ku—ku busyu Bwako, Mwami, tacikwe makani muntu ncayeeya kujatikizya ndiswe,

eco bantu bambi nco baamba. Mwami, leka kusalala... zianza zyesu zisalale. Azi lweezegwe a Ijwi lya Leza; zikonzye kulweezegwa loko, Mwami, cakuti takukabi ndulwe iijanika muli ndiswe. Kuciindi notukombelezya, mu bulubizi bwesu bwini, cakuti Bulowa bwa Jesu Kristo buyoima aakati ka ndiswe a Leza, cakuti Uyo langa aansi aali ndiswe kwiinda mu Bulowa bwa Jesu; kutali aa bululami bwesu bwini, na kuti ndiswe bani, eco ncootwa kacita, pele ku bweelelo Bwakwe bulikke. Leza, ko cipa!

¹⁷⁹ Akube kuti omwe oyo uukkede awa sunu masiku a kumvwa Mulumbe, kutabi kuti omwe wabo asweeke, kuzwa ku mwana muniini loko kusika ku muntu wakakomena loko. Akube kuti kuyanda kwabo kusalala kube buyo kwa Leza a Ijwi Lyakwe. Ta tuzi eco ciindi ncanga Wa libonya, na eco ciindi canga Wa twiita kuyovwiila kutala kuya ku Lubeta. Ta tuzi ciindi eci canga Wa cita, mbuli mbo cakabede, kugwisya kardi lyesu kuzwa ku caanzikilo, kwaamba, “Ngu ciindi cakuboola ku muunzi. Mweelede kuunka.” Leza, tugwasye kulibamba ka tusalala. Ko cipa, Mwami.

¹⁸⁰ Akube kuti tupone kusikila ku Kuboola kwa Mwami, ikuti na cilakonzeka. Akube kuti tu cite zintu zyoonse ezyo zili mu nguzu zyesu, ku luyando a kumvwisya, kumvwisya kuti Leza ulingula nyika, mazuba aano, kuyandaula mbelele zyoonse zisweekede. Alimwi akube kuti twaambaule a mbabo a mupailo weelede wa luyando a Ijwi lya Leza, kuti tu konzye kujana yomwe eyo ya mamanino, kutegwa inga twaya ku Muunzi, a kuzwa mu Edeni eyi nkulukulu ya Saatani kuno, Mwami.

¹⁸¹ Eyo mboizulwa iyyakidwe aa cisusi, a banakazi babotu, mbuli mbo kwiitwa mu nyika, akuzibya kwabo kuli awa, “Tu lazibya, elyo tu yanda balombe kuti baboole a kweebeka ku masyu aabo, a basimbi babotu basamide tubbudula,” nkoonya kuli basikapepele a zipekupeku; a misyobo yoonse ya busofwi a guamu, a Hollywood; misyobo yoonse ya madresi, aa banakazi mabi, atombe a buvuule. Elyo—elyo bamaalumi kaba pilingene a kubweza zikobela zya banakazi, a kugela masusu abo mbuli banakazi; a banakazi mbuli bamaalumi.

¹⁸² O Leza, ino ndi oora libyaabi loko ndo tupona mo! Oh, koboola, Mwami Jesu, koboola! Koboola, Mwami! Kotusalazya aa Bulowa. Kogwisya busofwi a ndulwe zyoonse kuzwa kuli ndiswe. Tu lekele tupone, Mwami, tulekele tu pone kungsi lya Bulowa, lyoonse, kumbele Lyako. Nku yanda kwa myoyo yesu, a ku kombelezya kwesu kusinizize.

¹⁸³ Oyandwa Leza, kulibikidwe aa cibumbi...na aya, desiki, sunu masiku, oko Makani mabotu nkwa bikwa. Mwami, awa kuli bikkidwe tutambala, a atuputu tuniini oto twiinka ku balwazi a bapengede. Lekela mupailo a lusyomo, Mwami, kuzwa ku myoyo yesu eno, mu busyu Bwako. Mpawo,

Mwami, ikuti na kuli cintu cili coonse citasalali muli ndiswe, Mwami, bweza kwesu. . . tubweze kuya ku lubeta eno; elyo twa kombelezezya luse. Yubununa kuli ndiswe eco ncotucita cilubide, Mwami, kutegwa inga twa lombamba, ku bweza Bulowa a kutusalazya. Koponya bantu baciswa aaba alimwi baponye, Taata, kufumbwa nko cuunka, kufumbwa busena nko baunka. Acibe boobo, Taata.

¹⁸⁴ Ko tupa kuyuma kwa bukanze ikwa kubelekela Nduwe, alimwi Yebo olike. Ko cipa, Mwami.

¹⁸⁵ Ko pa bukwabilizi ku bantu aaba bayandwa abo bali mu mugwagwa kuya ku ng'anda.

¹⁸⁶ Nda Kulumba ku nzila Njo ponya bantu. Elyo mwana wa Mucizi Shepherd a Mukwesu Shepherd, wakali cisa aa ncinga, Nda lombamba kuti kwiina bubu buyoosika kuli oyo; muntu muniini kacova ncinga yakwe, Nda lombamba kuti uyooba kabotu. Twa Kulumba nkambo ka kuponya Kwako kwa baaba bamwi abo mbe twalombamba. “Elyo tu lizi kuti eco nco tulombamba, tula citambula, nkaambo tu lijisi kaanzambwene muli Umwi oyo wakapanga cisyomezyo.”

¹⁸⁷ Ko tupa luzyalu Lwako, Mwami, a kujatila zibi zyesu, twa lombamba mu Zina lya Jesu Kristo. Amenii.

¹⁸⁸ Sena mula Mu yanda? [Mbunga yaamba, “Amenii.”—Mul.] Sena mula Mu syoma? [“Amenii.”] Sa mwacimwa a kukatala ku bwami bwa Saatani? [“Amenii.”] Sena mula syoma iboola ku Mileniamu, ku Mileniamu Yakwe; Yakwe, ku Edeni Yakwe? [“Amenii.”]

¹⁸⁹ Sa mulasyoma yabumbwa sunu? Amulange, zintu zyoonse zili aa mbaakani ya bantu bapampu. Zyoonse, zintu zyoonse, zyelede kutondezegwa ku nzila ya sayansi kabatana kuzisyoma.

¹⁹⁰ Elyo tokonzya kutondezya Leza mu nzila ya sayansi. Mu lelede ku Mu tambula ku lusyomo, “Nkambo oyo uboola kuli Leza welede kusyoma kuti Mpali, alimwi ngu sikupa bulumbu kuli baabo ba Mu yandaula ca moyo onse.”

¹⁹¹ O Leza, ta Ndi yandi kuziba cintu neciba comwe cita Bulowa bwa Jesu Kristo obo bundisalizya kuzwa ku cibi. Taakwe cintu ncezi cita Jesu Kristo. Elyo mbuli Paulo wa kaindi mbwa kaamba, mbubonya Nda amba sunu masiku, “Taakwe cintu ncezi aakati kanu, cita buyo Jesu Kristo, a Walo wakabambulwa.”

¹⁹² Oko nku koonse nko Ndizyi kumwaambila. Kutii, Bbaibbele eli, Nda syoma a moyo wangu onse (ikuti na Ndizyi moyo wangu), kuba Ijwi lya Leza lilondokede lisalala. Kuli Eli Nda pona. Kuli Eli Nda ima. Alimwi ikuti ni Ndali jisi maumi aali zyuulu zili kkumi, inga Nda yanda kupa zibeela zyoonse zyambubo ku Ijwi eli, nkambo ngu Ijwi lya

Jesu Kristo. Alimwi ta Ndi kwe makani kunji nko basola ku litondezya kuti Li lilubide, kunji obo sayansi mboisola ku Lya amba kuti talisyomwi, a zimwi zimbi. Kuli ndime, Ncintu luzutu mu nyika nce Ndi konzya kusyoma, ngu Ijwi eli. Ngu wangu. Nda Mu yanda. Sena tamuciti? [Mbunga yaamba, "Ameni."—Mul.]

¹⁹³ Ikuti na kuli cibi mu moyo wako, ikuti na kuli kampenda mu moyo wako, ikuti na uujisi cintu cili coonse, kokomba eno a kulomba Leza kuti akujatile. Yebo undi kombele; Njo kukombela. Leza amu longezeye, nje nkombo yangu.

Mane tu kaswaangane! mane tu kaswaangane!
Leza abe andinywe mane tu kaswaangane
alimwi!

¹⁹⁴ Sena mula yandana? [Mbunga yaamba, "Ameni."—Mul.] Johane wakaamba, "Nobana baniini, amu yandane." "Amu yandane, nkambo luyando luvumba zibi zinji." Lino atu sukane maanza umwi aumwi.

Leza abe andinywe mane tu kaswaangane
alimwi!

Mane tu kaswaangane! mane tu kaswaangane!

¹⁹⁵ Lino amube abuyya kuli umwi aumwi. Amube abuyya ku bantu boonse. Kolanganya kabotu mweenzinyoko. Kamuli bamba kuba batakwe impu mane Jesu akaboole.

. . . matende;
Mane tu kaswaangane! mane tu kaswaangane!
Leza abe andinywe mane tu kaswaangane
alimwi!

¹⁹⁶ Sa mula Mu yanda? [Mbunga yaamba, "Ameni."—Mul.] Eyo ne nkombo yangu. Amu ndikombele; Njo mukombela. Nde elede kujoka ku Tucson eno. Elyo Nda—Nda lombamba kuti Leza uyo mulongezya nyoonse. Ndi joka kuzwa ooko kuya ku Canada, a kujoka ku Colorado; koonse, koonse, koonse, mwabona. Kusikila. . .

¹⁹⁷ Mukwesu Tony uli kokuya, elyo cintu cipati cacitika. Nkonya kubweendelezi bwa Vatican, mu Rome, bali mukwiitila lubukulusyo, muswaangano, wangu kuti ndiinke kuya a kubamba lubukulusyo mu Rome, mu Rome. Wazwaa kujoka. I bantu bali antoomwe. Ba kajana busena bupati bwa zyakucitikila kuya, bula busena bweelede bwazyuuno zya bantu bali zyuulu a zyuulu, elyo bayanda ndime kuunkila lubukulusyo. Ba yanda kubona bulemu bwa Mwami mu mulimo. Ta ndizyi. Nde elede ku cikombela, kubona eco Mwami ncayo ndaambila. Oh, ma! Amuyeeye, amukombe, swebo toonse antoomwe. Tula beleka. . .

Tu langilila kuboola kwa Mufutuli wesu
uulelekedwe,
Amubone, a kubona matu a mukuyu eno asiya;
I Makani mabotu aa Bwami Bwakwe ainka
ku masi oonse;
Elyo tuli mumsi kumamanino, mbokukonzya
kubonwa.

198 Sa mbombubo? [Mbunga yaamba, “Ameni.”—Mul.]

Mpawo ndyoonya mukukondwa tuyo
tondezya Mulumbe wa kulibonya Kwakwe
kulelekedwe,
Eno Ula boola mu bulemu, kwaambila bantu
boonse;
Mpawo amusinsimuki, nywebo nobasalali ba
Mwami, nkaambonzi ncomufukula kakuli
mamanino aswena,
Atu libambile ku kwiitwa oko kwa mamanino.

199 Uyo langa kumbo akutanta kujoka alimwi, bumwi bwa
mazuba aya, amuyeeye buyo. Uyo cita ncobeni. Elyo eco
cililuleme. Kusikila eelyo:

Kotolelela Zina lya Jesu,
Mwana wa kuusa a wa mapenzi;
Li yoomupa lutangalo a lugwasyo,
Ko libweza, koonse nkoya.

Zina liyandisi (Zina liyandisi), O mbolili
bbotu!

Bulangizi bwa nyika a lutangalo lwa Julu;
Zina liyandisi, O mbolili bbotu! (mbolili
bbotu!)

Bulangizi bwa nyika a lutangalo lwa Julu.

Ku Zina lya Jesu kukotama,
Kuwa cakufugama ku matende Aakwe,
Mwaami wa bami ku Julu tuyo Mu samika
musyini,

Ciindi lweendo lwesu lwamana.

Zina liyandisi, O mbolili bbotu!

Bulangizi bwa nyika a lutangalo lwa Julu;

Zina liyandisi, O mbolili bbotu!

Bulangizi bwa nyika a lutangalo lwa Julu.

200 Lino, aa kampango aka kamamanino, atu kaimbe amyoyo
kiikoteme eno.

Kotolelela Zina lya Jesu,
Mbuli ntobo ku tooze toonse;
Elyo cindi masunko akubungilila, (ezi zintu zya
bwami bwa Saatani, mwabona, mwabona)
Koyoya buyo Zina eelyo lisalala mu nkombo.

201 Kwa mana; mpoonya kozwa. Ci labeleka. Nda kacisola. Ko cisyoma buyo eno, nkaambo ciyo beleka. Koyamba buyo Zina Lyakwe lisalala mu nkombo.

. . . Zina Iya Jesu,
Mbuli ntobo ku tooze toonse;
Cindi masunko akubungilila, (Ucita nzi mpawo?)

Koyamba buyo Zina eelyo lisalala mu nkombo. (I Civumbyo ciyo vumba busyu bwako mpawo.)

Zina liyandisi (Zina liyandisi), O mbolili bbotu!

Bulangizi bwa nyika a lutangalo lwa Julu;

Zina liyandisi, O mbolili bbotu!

Bulangizi bwa nyika a lutangalo lwa Julu.

202 Atu kotamike mitwe yesu eno, kuciindi ne Ndi lomba Mukwesu Beeler kusule kuya kuboola kuno ku cibumbili. [Mukwesu Branham watalika kung'ung'una *Kotolelela Zina Lya Jesu*—Mul.]

Koyamba buyo Zina Lyakwe lisalala mu nkombo.

203 Ko tumwaisya eno, Mukwesu Beeler. Ko tumwaisya mu nkombo.

Zina liyandisi,

Bulangizi bwa nyika a lutangalo lwa Julu;

Zina liyandisi (Zina liyandisi), O mbolili bbotu!

Bulangizi bwa nyika a lutangalo lwa Julu.

204 Lino a mitwe yesu kiikoteme, a myoyo yesu kiikoteme. Mukwesu Beeler, umwi wabaabo mbo tubeleka abo kuno, Mukwesu Estle Beeler, mukwesu mubotu Munakristo, mwaalumi uusyomeka. Ndi lamulomba kuti amwaisye nkamu ya bantu, sunu masika, mu nkombo. Leza aku longeye, Mukwesu Beeler.



EDENI YA SAATANI TNG65-0829
(Satan's Eden)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa mu Nsondo ku mangolezya, Ivwivwi 29, 1965, ku Branham Tabernacle mu Jeffersonville, Indiana, U.S.A., wakagusigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu ciyanza cakujokolosya, kusandululwa mu misyobo iimbi, na kubelesegeka kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org